

አንፋር 35^{ይት} ደውረት ክድመት ወጠን ቀሰም እንዴ ከረው ደሐረው



እግል ሐል እት ሳወ ናይ 12 ፊሰል ምህር አካዳሚ ታብዖ ወናይ ዐስከርየት ወሰዶስት ተእሂላት ነስኦ ለጸንሐው አንፋር 35ይት ደውረት ክድመት ወጠን ዲብ ዮም 15 ጁላይ ደሐረው።

ዲብ ርኢስ ኢሲያስ አፍወርቂ፡ ውዘረኡ ውቁላም መስኡሊን ጀብህት ሸዕብየት እግል ዲሙቅራዊት ወዐዳለት፡ ቅያደት ጃሽ ውብዕዳም ሰብ ሰልጠት ለሐድረው እተ መናሰበት፡ መድሐረት 'ምስተንክር ሄራር ሰባተት' ሐንቴለ ትብል ሰቅራት፡ ዕላቀት ሸባብ ኤረትርየ

ወሳወ ወዲብ ወጠኖም ለህሌት እሎም ፍቲ ለልኦርኤ እብ ብሎካት ለትካፊለ ናይር አሴራር ዐስከር ቀደመው።

ቃእድ መርከዝ ተእሂል ክድመት ወጠን ኮሎኔል ደበሳይ ግዴ ዲብ ቀደመዩ ተቅሪር ሐጪር፡ 35ይት ደውረት ክድመት ወጠን ዲብ ተድራብ ዐስከራ፡ አደብ ወአክላቅያት ሕምድት ወምነ ሐልፈ ደውራት ዝያደት ፍድብ ለአርኤት ክምተ ሸርሐ።

ምኖም ለ49.8 ምእታይት አዋልድ ዲብ ገብኦ፡ እግል ክሉ

ለትህየበዩን ተእሂል ወወቀይ እብ መዕጸም ክምሰል አትመመዩ ለአክደ ኮሎኔል ደበሳይ፡ ዓም ጌማም ፍገራት መትድሕረት ዲብ ክሉ ለሻረከው እቲ ተእሂል ዐስከሪ 75.4 ምእታይት ክምሰልቲ አብረህ።

ኮሎኔል ደበሳይ ግዴ ዲብ ደንገብ፡ ተድራብ ምንለ አስተብደው መትደርቡት 4.2 ምእታይት እብ ለትፈናተ አሰባብ ለአትካርም እት ህለው፡ 95.8 ምእታይት ህዬ ተእሂሎም እብ ዋጅብ እንዴ አትመመው እት መድሐራት ክምሰል በጽሐው እት ሸራሕ።

ካሰባሙ ለህለው አምር ዲብለ ገዩሱ አካናት እግል ልትሐፈዝ ወልትናየት አትፋቀድ።

ርኢስ ኢሲያስ አፈወርቂ ዲብለ ቀደመዩ ከሊመት፡ “እግል መድሐረት ወዋልዴን አሰናይን እግል ምደርቡት ወመደርሲን ህዬ ሐምዴ ዛይደት፡ ” ዲብ ልብል፡ መድሐራት 35ይት ደውረት ክድመት ወጠን ጸብኢት ወህጃማት እንዴ አፍሸልን ዲብለ ደቀብን እቲ፡ ዲብ ለልትብጭብጭ ድወል ግዋሬ ወእብ ገያደት ለትትባደል ዐለም እግል ሐሰት ዐማር ወመዳፍዐት ዲብለ ንሄርር እቲ ለህሌን ወክድ ገብእ ህለዮት ፍንጽይ ቃነ ክም በ ሸርሐ።

ርኢስ ኢሲያስ እንዴ አትሉ፡ ዲብ 34ይት ደውረት ለአስተብዳናሁ አትሓያስ በራምጅን፡ ምስለ አሰክ እል ክእሉል ለህለ ተጃርብ፡ 35ይት ደውረት ዲብለ ሐሰት ዐቦት ቅድረት አዳምነ ጀላብ እግል ትዋሌን፡ ዲብ በራምጅ ክድመት ወጠን ምህም ምዕራፍ ክምሰል ተ ወደሐ።

ዲብ ደንገብ መድሐረት እግል ሸዐብ ወወጠን ኤረትርየ እብ ክለ ሒለቶም ክምሰል ክድሞ፡ እግል አህዳፍ ክድመት ወጠን እግል ለአውቁ ክምቶም ህዬ ቀሰም ከረው።

ለመድሐራት፡ እብ ወዝዶት ጀዋእዝ እግል ፈዳብያም አፍራድ ወውሐዳት፡ ክምሰልሁመ እብ ዕፌ ዓዳት ናይረት ዐለት።

ናይ ዮም ዓመት ፍገራት ወጠንያይ እምትሓን 2ይ ደረጃት ዐቦት ተኣርኤ

ናይ ዮም ዓመት ፍገራት እምተሓት ወጠኒ 2ይ ደረጃት፡ ምነ ናይ ደዓም እብ ሐድ 4 ምእታይት ክምሰል ትወቀለት፡ ዲብ መአሰስት ውቁል ተዕለም ወበሐስ ዳይረክተር ወጠንያይ መርከዝ ሚመዮት ወጌማም ደክቶረት ብሰራት ገብሩ ሸርሐት።

እግል ኤሪና እተ ሀበተ ሐብሬ፡ ዶክቶረት ብሰራት ዲብለ እምተሓን ምነ ሻረከው 14,320 ደረሰ፡ 4,664 በህለት 32.6 ምእታይት ናይ ዲግሪ ወዲፕሎመ ንቅጠት ክምሰል ረክበው ሐበረት።

ምን እሎም 3,174 በህለት 22.2 ምእታይት ናይ ዲግሪ። 1,490 ህዬ ናይ ዲብሎም ንቅጠት ለረክበው ቶም።

ምን ዕልብ ናይለ ሐልፈው ለ48 ምእታይት አዋልድ አንሳት፡ 45.7 ምእታይት ናይ ዕሎም ደረሰ፡ 25 ምእታይት ህዬ ናይ ኣርት ደረሰ ክምቶም ሸርሐት።

ናይ ዮም ዓመት መምትሕነት፡ 98 ምእታይት እብ ርቱብ ዲብ ሳወ ወመዳርስ ቴክኒክ እት ደርሶ ለሓገው ገብኦ እት ህለው፡ ምን ሐዲስ ምነ እምተሓንው 214 ደረሰ፡ 94 ምእታይት ዲብ ዲግሪ ወዲብሎመ ክምሰል ሐልፈው፡ ዶክቶረት ብሰራት እብ ተውሳክ አፍሀመት።

ወጠንያይ እምተሓን 2ይት ደረጃት ዮም ዓመት ምን 13 አሰክ 18 ማርስ ዲብ ክለ ወጠን ክምሰልሁመ ዲብ ርያድ ወጅደ ሰዑድየ እብ ዓመት ዲብ 10 መራክዝ ክምሰል ተህየበ ልትአመር።

መርከዝ ሚመዮት ወጌመሞት፡ እግል ዲብ ኩልያት ለሐልፈው ደረሰ ትምኔቲ ሰኔት ሸራሕ ዲብ ህሉ፡ እግል ለተሓልፍ ንቅጠት ለይአምጸአው ህዬ ምን ሐዲስ ናይ አምተሐናት በክቶም እብ ዋጅብ እግል ልትነፈያ እቡ አትናየተ።

ኩልየት ሀንደሰት ወቴክኖሎጂ ደረሳህ ተኣድሕር

ኩልየት ሀንደሰት ወቴክኖሎጂ - ማይ ነፍሒ እግል 16 ኢነት እተ ወዴት ዓደት መድሐራት 146 አንሳት ለብእቶም 424 ደረሰ እብ ዲግሪ ወዲፕሎመ እት ዮም 15 ጁላይ ዲብ ቃዐት መዕሀድ ቴክኖሎጂ ኤረትርየ - ማይ ነፍሒ አድሐረት።

ለመድሐራት እብ 17 መጃል ተዕለም ገብእ እት ህሉት፡ ናይ ዲግሪ መትድሕረት፡ 27 እብ ሀንደሰት መደንደን፡ 25 ሀንደሰት ኪማኤያት፡ 24 እብ ዕሎም ወሀንደሰት ኮምፕዩተር፡ 21 እብ ሀንደሰት ከሀረበት ወኤሌክትሮኒያት፡ 19 እብ

ሀንደሰት ተዕዲን፡ 15 እብ ሀንደሰት በሐር፡ 14 እብ ሀንደሰት መካኒክ ወ8 እብ ሀንደሰት ሐርስ ገብኦ እት ህለው፡ ናይ ዲፕሎመ ድሐራም ህዬ፡ 38 እብ ተዕዲን ቴክኖሎጂ፡ 36 እብ ቴክኖሎጂ ኤሌክትሮኒያት፡ 32 እብ ቴክኖሎጂ ብናእ፡ 30 እብ ቴክኖሎጂ ኤሌክትሮኒክስ፡ 29 እብ ሀንደሰት ቀየሶት፡ 29 እብ ቴክኖሎጂ መቶር፡ 27 እብ ቴክኖሎጂ ኮምፕዩተር፡ 26 እብ ቴክኖሎጂ ኮምፕዩተር ወዕላቃት ሸቡካት፡ 24 እብ ቴክኖሎጂ ተብሪድ ቶም።

ዲብለ ሰብ-ሰልጠት ሕኩመት

ወጅብህት፡ ዐዘመት ለገብኦት እግሎም ናይ ሕሸመት ጋሽ፡ ሚርሐት ደያናት፡ አንፋር ኩልየት፡ ዋልዴን ወመትድሕረት ለሐድረው መናሰበት፡ ዐሚድ ኩልየት ሀንደሰት ወቴክኖሎጂ ዶክቶር ካሕሳይ ንጉሴ፡ ለኩልየት ብቅዓም ደረሰ እት ተኣድሕር ዲብ ዐማር እቅትሳድ ወጠን ዶር ክም በ ወግረ እላመ እብ ለሐሰት ክም ትከድም ዲብ እት ለሐብር፡ መተንኮብ ዲብ መደርሲን ውላድ ካርጅ እግል አንቀሶት አብካት ተዕለም ክም ተህይብ ወእግል አደቃቡ ትትጸገም ክም ህሌት ሐበረ።

ዲብ መድሐራት፡ 28 ፈዳብያም ደረሳይ ሸሃዳት ተህየበው። እዚ ለኩልየት፡ 86 መደርስ ዲብ ለህሉ እግሉ፡ ምኖም 43 ኤረትርየን ቶም፡ ብዕዳም 17 ኤርትርየን መደርሲን ህዬ ዲብ ለትፈናተየ ድወል ካርጅ ናይ ሐቁ መድሐራት ድሩሶም ታብዖ ህለው።





ሸክል እብ ሰፍፍ እንዴ አፍገረው እግል መትፈርጀት ለረይሐ ዕፌ ዐስከሪ ቀደመው።

አዋልድ እበ ሕግ ለመሰል አክራንን ቀጣይን ወውላድ እበ ዕኩክ ገረግጥም፤ ናይ ቀያያር ሐረከት አክራን ወምሰለ አክራን ለልትባደል ሐረከት ዶል አርአው ህዩ፤ ዔፍዩቶም ዎሮትክ ዲብ ምግሳዩ እት ልትዐጀብ፤ “ግድም

ሳዋ ለሐልፈት ሰንበት ንኢሽ 15 ጁላይ፤ ለምን ክፍለት ወሬሕ ኣጎሰት 2022፤ ለሓገው ዲበ ወናይ ሰነት ምህሮ 12ይ ፈሰል ወተድራብ ለነሰአው ዲበ ውላደ አንፋር 35ይ ደውረት ክድመት ወጠን ለአድሐረት ዲበ አምዕል ዐለት።

ሳዋ መድሐራት ዶል ተህሌ፤ ኩሉ መዳሊት ቀደም ሳምን ቱ ለትአተምም። ፈርወንተር ናይል ጋሾታተ ለትትከበት ዲበ ምዕል ህዩ፤ አትናዳፍ፤ መትላማድ እትየት ወፍግረት ዲብ ሰቱጅ፤ ክምሰልሁመ ሰርጎ መንዴራት እት ሸዋርዐ ወአካን ዕፌ ላቱ ሰቱጅ እንዴ አታመመት፤ መርዓት ዐሽል ታርፈ ሌጠ ትገብእ። ለዐሽል ህዩ ለዶለ መድሐራት ደረሳህ ተምም።

ሰቱጅ ሳዋ ምን በድሪ ሳቦታት ጽቤሕ ምድር መትድሕረት ወእሎም እግል ለአግምሎ ለመጽአው መሰኡሊን ወዕዙማም ልትከበት አጽበሐ። ምን ሳዐት 6፤ 30 ህዩ ለበርናምጅ እብ ዝክረት ሹህደእ ክም አንበት፤ “መን ኢኻ” ለትብል ሕላየት እብ ትግርኛ ክም ተሐሌት፤ ማርሻት ዐስከርየት አንፋር 35ይት ደውረት ክድመት ወጠን እብ ብሎካት እንዴ ትካፈለው ፍርቀት ማርሺን ባንድ ዲብ ትመርሐም፤ ‘ሸባብ ሳዋ፤ I LOVE U ERITREA” ለልብል

ዐበው ወሸንገለው፤ ዕን አባዮም ዐመ ትግበእ!” አተበለው።

እንፋር 35ይት ደውረት ክድመት ወጠን ምን ሰስ አቃሊም ዐድነ ለመጽአው ውላድ ወአዋልድ እት ገብኡ 49.8 ምኖም አዋልድ ወ50.2 ህዩ ውላድ ዐለው። ከሊመት መናሰበት መድሐራት ለአሰመዐ ቃይድ ህይአት ተድራብ መዐስከር ሳዋ ኮሎኔል ደበሳይ ግዴ፤ እግል መትድሕረት ወዋልዴን “አሰናይ እትለ አብጽሑኩም ወአንጽሑን” እት ልብል፤ እሎም ደረሰ እሎም እብ ብንዶት ገርቦም፤ ምህሮ አካዳሚ፤ አደቦም ወለአርአው ነሻጣት ምን ቀደሚሆም ለዐለ ደውራት ለሒሰ ወቀይ ክም አርአው አከደ።

ምን እሎም ለ95.8 እተ መናሰበት ልትደሐር ዲብ ህለው፤ 4.2 ህዩ እብ ለትፈናተ አሰባብ ክም አትካረመው ሐበረ። እሎም ደረሰ ምን እት ሳዋ ለከልእው ወቅይ፤ ሰቦ ወሬሕ ለገብእ ናይ ምህሮ አካዳሚ ወቅት እት ገብኡ፤ ወሬሕ ናይ ንዛም (እንድባዋ) ወሰለሰ ወሬሕ ህዩ ተድራብ ዐስከሪ ክም ቶም ለአፍህመ ኮሎኔል ደበሳይ፤ ሕኩመት እሎም ሸባብ ታማም መዋዋኒን እግል ቲደዮም እስትሰማር ብዞሕ ክም ትወዴ

ሳዋ፤ ሰልም ዐውቴ ወዐቦት ሸባብ



ዲቦም ወደሐ።

እንፋር 35ይት ደውረት ክድመት ወጠን እግል ልድሐር ምን መሰር እት ፈርወንጠር ሳዋ ለዔረር እሰ ኢሲያስ አፍወርቂ፤ ከሊመት መድሐራት እተ ቀደመ ዲበ ኢነት፤ አሰናይ እግል መትድሕረት፤ መረብደኖም ወዋልዴን ክም ቤሉ 35ይት ደውረት ክድመት ወጠን ትደሐር እተ ለህሌት መርሐለት፤ እበ እንክር ለዎሮ ገሸለት ኮሺድ-19 እንዴ ተዐዴ፤ ዋይዲባት፤ ወህጁማት ሰብ አከይ-ድስ በልቀት ዐላል እንዴ አከድ፤ እት ቀበት ለልትብጭብጭ ድወል ግዋሬ ወእብ ሸፋግ ለትትቃየር ዐለም አስክ ዐማር እተ ንሄርር ዲበ ለህሌነ ኢነት ትገብእ ሰበት ህሌት፤ ናየ ቃነ ፍንቱይ ቤ።

ምን 34ይት ደውረት ወእንሰር እንበታሙ ለህሌነ አትሳናይ በራምጅ ዐቦት፤ ምሰለ ራክባሙ ለህሌነ ተጃርብ አትሳናይ ወመዳሊት ሰኒ ትወሰከዩ፤ ለበርናምጅ እብ ፍዕል እት መዓሉ ክም ልውዕል፤ እግል እንበታሙ ለህሌነ በራምጅ እት ለትወቀለት ዐቦት ወመዳፍዐት እግል ለአብጼሕ ወዝያደት እት ለሒሰት በርከት ቅድረት-አዳምን ጀላብ እግል ልዋሌ፤ እለ ደውረት እት በርናምጅ ክድመት ወጠን አህምየት ፍንቲት ለትጽብዋ ደውረት ተ። ሰቱት ለህለ በራምጅ ህዩ ክእን መሰል።

1, ንቃዋ ሐሊፍ ለረክበው አካዲምያይ ምህሮሆም ዲብ ለአተላላ፤ ሕርያናቶም ምሰል ወጠንያይ አውለውያት እንዴ

ትመሳካ እብ መጃላት ክም ልትመቃረሕ ወዲብለ ልትወጤ አጅናስ ምህሮ ክም ለአቱ ውድየት ቱ።

2, ንቃዋ ሐሊፍ ለኢረክበውመ፤ ላዝም ንቃዋ ሐሊፍ ክም ረክቦ ወዲብ ለትፈናተ መእሰሳት ወአካናት እንዴ ትወዘዐው ናይ አካዳምየት ምህሮሆም ዲብ ለአተላላ፤ እብ ተጃርብ ሸቅል እት በሸሉ፤ እት ጠወሮት መቅደረት አዳምን ተረት እግል ተህሌ እሎም ድራሰት ርትብት ሂቡቶም ለሒሰ አብካት እግል ልትከለቅ እሎም ቱ።

እሊ ሰቱት ለህለ በራምጅ እግል ልትሰርገል፤ እሰልፍ ለደረሰ እብ ተአስትህል እግል ልፍዝዖ እሉቦም፤ መደርሲኖም፤ መረብደኖም ህዩ አምር ካፊ እግል ለዐንዱቆም ወዋልዴንመ ሰኒ እግል ልሰጅዕም ወእት ሸቅል እብ መዕጸም እግል ልክስእም እትፋኔ።” እት ልብል ከሊመቱ ደብኡ።

ሐቆ እሊ እግል ምን ሰነኖም ለሒሰው ሸባብ ወሻባት 35ይት ደውረት፤ ክምሰልሁመ ከፈፍል-ዴሽ ጀዋእዝ ተህየቤ፤ ዮም ዓመት ህዩ እብ ናይ ኩሉ ዕመማይ ወራታት ዐስከርየት 1ይ ክፈል-ዴሽ ሀርመ መዐስከር ሳዋ ገብኦ ወለበዝሐ ጀዋእዝ ጃቀፈ። እት መዐስከር ሳዋ ዲብ ወራታት ዐስከርየት ለልትጃገሮ አፍራድ ልግብኦ ወከፈፍል-ዴሽ ዲብ ተንሺን፤ ሐረከት ብንዶት ገሮብ፤ አደብ ወሄራር ማርሻት ዐስከሪ ልትጃገሮ ከለትዐውተ ልትዐውት ምኖም።

ጸሓይ አዳውሕየት እንዴ ኢትዕሬን፤ እት በራድ እግል ክልኤ ሳዐት ሐልየት እብ ትግርኛ፤ ዐረቢ፤ ትግሬ፤ ብዳዌት፤ ናራ፤ ኩናማ፤ ወዐፋር እት ለአተራቱ ወመትድሕረት ገሌሆም እት ጣቡር ባዋራም ወሰርም’መ ሄራር ማርሻት እት ወዱ ምድር ኩሉ እበ ጨብላይ ሕብር-ሰቦት ልባሰ ዐስከሪሆም፤ በርናምጅ ክም ተ’መ ሕድ እግል ልትሳለም ወአዳምም እግል ልርከቦ ለሚዳን ወሰቱጅ ክመ አንበጠ ኬን ወእንዘ ፍልክ ቤለው ዲቡ። ድራመ ‘ገናዞ-በህለት መንገዝት’ ምን አዳም ብዞሕ ለአትፋግዐት ፍሬ ዕፌ ዓዳት ዐለት። ምሴተ ህዩ ምን ሳዐት 8፤ 00 አልዕሽ ዝላም ጋድም ሳዋ ወደዋራቱ ተአትባርድ ለትመዬት እተ ላሊ ዐለት። ፋል ኪር ቱ፤ እብል መድሐራት ፍራሰ ዕልም ወጠውር፤ ወእብለ ዝላም ከረም ምድር ተአትባርድ!

ከሳዋ እበ ዋዑም ማየ፤ እበ ነዲፍ ሀወእሁ፤ እበ ኤማን ወሰሙደ እግል ሰነት ሕድርቶም ለዐለት ሸባብ እንዴ ሳርሐት፤ እተ መጽአ ክልኤ ሳምንመ ሐዳይሰ አንፋር 36ይት ደውረት እግል ትትከበት መዳሊተ ዋድየት ህሌት። ኩሉ ሄራር ሸባብ እት ተጠውር ቲክኖሎጂ ወዐማር ወጠን ህዩ ምን ሳዋ ቱ ለልትበገሰ፤ ከሳዋ ሰልም ዐቦት ወዐውቴ ሸባብ እት ኩሉ መጃላት ተጠውራቶም ወዐማር ዐዶም ሰበት ተ፤ ‘ዲማት ዕልም እግል ሸባብ ወደማን እግል ወጠን’ ጋብኣት ህሌት።



ሄደትርዮፀሕዳስ

ክል አርቡዕ ለትጠ'በዕ ጀሪደት

መዳልያይ፦

- መሐመድ እድሪስ

ለይአውት ወአርተዖት

* ዘህረ ዐሊ

* ፋዋን አድም

ተለፎን፡ 121797/07121322

ፋክስ፡127749፤ ዕ.ሰ.ቡ፡ 247

ተውዝዕ ጀሪደት፡


ተለፎን፡ 200454

አትአመሮት፡

ተለፎን፡ 125013፤ ዕ.ሰ.ቡ፡ 1284

3^ይ ክፈል

እት ንዳል ኤረትርዮ ለኢትዮጵያውያን ዲሞክራሲያዊ ለኢገብአት ወለ ኢሳይፈት ወለ ኢትብህለት ይህሌት ወየዐለት። ዌረት ምን መዐደይ ሕዱድ ዐዶም፤ እግል በዳነ ወአሰረቶትን እንዴ ተዐንደቀው ለመጸአው፤ ወሕነ ፍዘ ወሕን እግል ንግበእ እግል እለ ቃልየት አርደትን ዕንዳቄነ እግል ንስደድ ለትፈረርኩ፤ ሐቀለ ቀበሊት ወዐልነ እተ መዐረከት፤ ሐቀ ገሌ ሳዐታት መቃትል ወዐዶሁ እት ሐቲ ጢሾ ትዐገለው እግል ትሰመዕ።



ለኢትትጸበሩ ፈዳብ አምር እንዴ ገብአ ልትርኤክ። በታከት ወሰባተት መብደኤ፤ ዐግል ወአደብ መቃትሊን ክምሰል መሰል ሰኔት ለልትሸርሐ እቡ ፍንቱይ ጠብሶ መናድሊን ወቅደደቱ ሰኔ ለልአትፈክረከ ጋር ትሩድ እት እንቱ ዐለ።

አይው፤ ሸሃደት ሳድቀት ምን ሳፊ ደሚር። በዐል አማን ለእብ ክርንቱ እት ሐቅ ገቢል ለሻረከ። አቤ! እግል ድዱ ለዐለ ሀደፍ እግል አርወሐቱ ለሀብ ሸሃደት ሐቅ ለአሰምዐ፤ በዲር አሲር ወምጅርም ወራር፤ ወሐሬ ምቃትል ሳድቅ እት ቀሉ፤ ወፍዕሉ ወሀደፍ ምስል ሀደፍ ገቢል ለአትዋፈቀ ማሞ አፈተ ወመልሂቱ።

አምር ዐጂብ ወለ ለአትፈክ እምበል አትራዛቅ ወሐሰት። እግል ቀቲልከ ፊሸን እትከ ለወዐለ ዌራይ፤ እንዴ አትዳሌ እግሉ እግል ተሐርቡ ወትትሐደሩ ኮንዶኤ፤ እምበል እብ ፍክር ወአምር እንሳንደት ለትሰልሐ መቃትል ትንዝም ጀብህት ሸዐብየት፤ ለወደየ ላቱ ሐድ ቱ ወእቤ አነ እምበል አትራዛቅ ወአትካባድ። መቃትሊን ኤረትርዮን ላኪን እብ መዋዲቶም



ኸምከ ኢተክገውኑከ!!!

ኖሶም እንዴ ኢደግሞ፤ ድዶም ለዐለው አሲሪን ሐርብ ህቶም እብ እንሳንደቶም ወሰኔቶም ሸሀደው እግሎም። ሸሃደት ባይነት ወካፍየት፤ ሸሃደት ዋድሐት ወባርሀት እት ምቀደም አባይ ወፈታይ።

አደብ ሬኤት ወሐጠር እት ወቅት ሐርብ ወገቢል እት ልትፈንጠር! ዐጅብ! ፋርስ እት ወቅት ሞት ወቅታል፤ ሐሩቀት ወቀደቡ እንዴ ሐክመ ምስል መትብእሳዩ እብ እንሳንደት ወእንድባዋ ዐስከራ፤ ክምሰል ቱ ድራሰት ካፍየት ሃይባምነ ህለው።

እሊ ናዮም እንሳንደይ እንድባዋ ህይ፤ ሸሃደቱ እብ እት ሐንቱ ተንዝም አትደም ለዐለው ዐሳክር ዌረት አቶብየ፤ እት ክል ዓለም እብ ሸክል ሺድዮ ወክትብ ልትነሸር ወልትነሸሐ ህለ። ዐፍወን እብላ ወዴኮ ላኪን ኢኮን። እምበል እለ ወደው እግልናቱ ምን እንሳንደት ለልትደገም ለህለ።

አቤ! ሲጋዱ እግል ሕርዶ ለመጤኩ እግል ትሕረዱ ወትጠልቁ ፍርዱ እት እዴካቱ። ፍርዶም ላኪን ፍርድ ፈርሀት ወሐሩቀት ኢኮን ለሐሬ እት ታሪክ ለአትዕሰ። ፍርድ እንሳን ወዓድል ለእግል መትብእሳይ እብ ሕርየት ወሰአየት እት አተላለየት ሐያት ለለሀይብ ዓድል ፍርድ ቱ ለዐለ።

ሐቆ ሕድርናቶም ወመትሓዋሎም እከለት እብ ሸመዮ፤ አሰክ አየ ገብእ አተጅሀው፤ ማሞ አፈተ ወመልሂቱ?

“ሕኩር ምኒነ ለዐለ ጅርሐ ሐቆ ትሰፈፈ፤ ወሰፍሩይ ምኒነ ለዐላመ ክብዱ መልክ፤ ለምን ጀብህት ቅታል ማጽኢም እብነ ለዐለው መቃትሊን አሰክ ድፋዱቶም አቅበለው። ወሕነ እት ሐንቱ ዔቅቢት (ዋርድየት) አምን ሰውረት አቴነ” ቤለ ማሞ አፈተ፤ ለእግሉ ትገዐዘ ሄራር ሐያት እግል ኖሱ ክምሰል ሕልም አድሐ እት ልትረአየ። ላመ እብ እንሳንደቱ ወእንድባዋ አደብዶቱ ለሸሀደ እግሉ ተንዝም አርወሐቱ እግል ኖሰ አሚነ እግሉ አቤት ለአማን። ህቱ ፍሩር እግሉ ለዐለ ሀደፍ፤ ወለ ሐሬ ጸንሐዩ ቴለል መትመጣዋር እግሉ አበው።

አምን ሰውረት እብ ፍንቱይ እግል ክሉ እት ሐንቱ ቃኑን ለልትገሌ ምጅርም እብ ክህላት

ወእንሳንደት ለጸብጦ፤ ፍንቱይም ምኤምረት ወሰብ ቅድረት ቶም እግል ኒበል እንቀድር። እብ ክምሰል እለ ፍንቱት ቅድረት እለ ህይ እግል አሲር ሐርብ ወምጅርም፤ ክል ነፈር ትንዝም እብ ክህላት ወሰብር ለለአደርሶ ወለመርሐ ወእት ፍክሩ ወአደቡ ፍንቱይ ተእሲር ለወዱ ወመሲር ሐያቱ ለቀይሮ፤ ፍራሰ ቶም ለዐለው። እብ ገሌ ምሸክለት እት ሐንቱ አምን ሰውረት አቴክ ምንገብእ ምን ጃምዐት አደብ ኢትከረጅኮ ኢትብለከ አርወሐትከ።

ሰኔ፤ መዳግሙ ለአተላሌ ህለ ማሞ አፈተ። “አይወ! እት ብሌቃት እት ሐንቱ አምን ሰውረት እት ሕኩ እት ወቅት ሸን ሲርከ እንዴ ጸበዋክ አሰክለ እተ ትሸይን አካን ትገይሰ። ሐቆ ሺንነ አይመ አሰክለ እተ ዐልነ አካነት እብ ልእግሉ አጽበዋውን ሲርነ ነአቀብል ዐልነ። አምን ሰውረት ቤት ሐብስመ እግል ቲበለ ኢትቀድር። ሲያሰት ሰቃፊት እብ ፍንቱይ ታሪክ ሸዐብ ኤረትርዮ እብ ከፈፍል ምጅትምዑ ወመሰትዕምረቱ ወእት ንዳል



አሰይድ ማሞ አፈተ ምን አሲር ዲብ ምናድል

ለትቀሰበው እቡ ደረሰነ ወእብ ዋጅብ ፈሀምናህ። እግላመ ዐለት እግልነ ቅድረት ድህርት ወካዋየት እግል ንቀይረ ወንሰይሐ ለቀደርነ እብ ፈድል ሸዐብየት ወአምን ሰውረት ቱ።

ህቱ ሌጠ ኢኮን ወድ ሚን አደሚ ፈታይ ወቀይ ወመትጸግማይ እግል ልግበእ ሐቆ ሐዘ፤ ምን አምን ሰውረት ወትዐለመ ወእቤ። ሕነ ክምሰል አሲሪን አድብር እት ጋድሞታት እንዴ ቀየርነ እግል ነአፍሬ ክምሰል እንቀድር እት አምን ሰውረት ተዐለምናህ። ክሉ ተዋልል ሐያት እት አምን ሰውረት አትፋዝዖት ዓም ገብእ እግሉ። ምስለ እግልነ ለዐቅቦ ለዐለው አንፋር መቃትሊን ህይ ትርድት ዕላቀት ወቀይ ወምስንዮት ወዴነ። እግል መሰል መሰሉሊን ለዐለው ከረ ተኪኤ ቀለተ አዘ ምስልነ ግሱይ ለህሉ፤ እንዴ ትሻመክ እግል በልቃይ እት ሻውጡ፤ እግል ክምሰል አምሩድ እት ልትፋገር ልትርእዩ አሰራሩ እት ተአቀምት ሰኔ ቱ ለአቀነአከ። ክል ዶል ህይ መለሀይክ እግል ልግበእ ወመጦርከ እግል ልሸቁ ትትምነዩ። ላመ ተኪኤ ቀለተ እደዩ ሻምክ እግሉ አበናይ፤ ኢሊዴኒ ምኑ ትብል ሐበት ክል አካን ቱ ወድዩ

በንግ እንዴ ገብአ። እብ ትወቀለት ህይ ፈተ ወቀይ ወአምር ሰቃፊት ወታሪክ ትከሰብ” ቤለ። ማሞ አፈተ እት ገዱ ወእት መዕነውያቱ ሸዐር መትሐባን ወሕሸመት ክምሰል እቡ ልሸዕር እቡ ክም ዐለ ልትብየን እግልከ። እሊ እት ክልኤ መርሐለት ታሪክ ድድ አሕድ ለሻረከ ነፈር ሲር ሐያቱ እብ ሄራር ሐበን ወሕሸመት እት ሸርሐ እብ ደሚሩ ጋንዕ ክምሰልቱ ልትብየን እግልከ።

አይመ ህጅክ ማሞ አፈተ ንታብዕ። ኮይሱ “ሐቱ አምዕል እት ብሌቃት ክምሰል ክል ዮም እግል ሸን ለንሄርር እቡ ሲርነ እንዴ ጸበዋክ እግል ነአቅብል ቱ እት እንብል አሰክለ እት ምንቀደምነ ለዐለ ሕሻል ወወደግ እግል ኒጊሰ አማውር ትህየቤነ። እሊ ሰድ እሊ ሰኔ ፈርሀት በይአተነ። ግድም እለ አምዕል እለ ሐያትን ክምሰል አክተመት ትፈሀመተነ። ክል እሲር ህይ እብ ጸቢር መንበሮ እግል መትላክያይ ለዩአድሕክ እቱ በለገታት አድብር ሳሕል አትቃመትነ። አቤ! አትቃማት ቡቲክ ሰአየት እንዴ ኢኮን አትቃማት መትፋካር ደዐለ



ወሐረሶም። ላኪን ክል ዶል እት ሐንቱ ፍርድ ጸሩ ለህለ ለትመጽኡ ኢለአምር። ህቶምመ አማኖም ቶም ኢነአትዐግበም። እብ ፍንቱይ እት መዋጅሃት ዐስከርየት ለትጸበጠ ሓርቅ ዎሮት ህቱ ኢፍርዱ እግል ኢለሀቡ ፈርሀቱ ክል ዶል ተ። እምበል እት ሐንቱ ክምሰል እሊ ተንዝም ጀብህት ሸዐብየት እት እንሳንደይ ቀዋኒን ለኢለአተንከብ እግል ኢልርከቡ ፈርሀ። ፈርሀት እለ አምዕል እላመ ሐልፈቶም። ለሐልፈት ህይ ክምሰል ኢመጸአተ ክል ዶል።

ሰኒን ሕሻሉ ዋለ። ክል አበነት ወዕጪት አመት ወሰድር ናይ እለ አርደት ወእብ ፍንቱይ ህይ አድብር ሳሕል ታሪክ ልትሰጀል እተ ዐለ። ለትሰጀለ ታሪክ ህይ፤ ዕለት ወሸሀር ወሰነት እት ልብል እብ ቀለም ወደዋት እት ሰጅል ሕፍዝ አካኑ ጸብዋ ዐለ። አይመ ሰነት 1981 ሄለል ትቤ። ከአሕዳሰ እለ ሰነትም ምን እተ ወቅት ለሀይ አሲሪን ለዐለው እግል ንስመዓ ቱ። አሲር ማሞ አፈተ እብ ክእኒ ሸርሐ።

“አይወ 1981 ክሎም እተ ወቅት ለሀይ እት ሐንቱ ተንዝም ጀብህት ሸዐብየት ለዐለው አሲሪን ምን ክሉ ለጀሃት እንዴ ጀምዐምም እት ሐቱ አካን አከበውነ። ሕናመ ምስል ደሚርነ እት ትሉሉይ መክሐደ አቴነ። እግል ሚ ቱ ሐቆ ክሉ እሊ ጅህድ ወድራሰት ለአብደው እትነ አዘ ጀምዐውነ ለህሌው? እት እንብል እት በሊሰ ራትዕ ለይእንረክብ ምኑ መክሐደ ደሚር አቴነ። ለሕሰብት ዐለት ላኪን እምበል ጀምዐነ ለዐለው ውቁላም ሰብ ሰልጠት ናይለ ትንዝም ለለአምረ ደዐለ። ክሉ ለከሰሱ አሲር ሐቆለ መጽኢ ህይ፤ ለፍቱይ መናድል ዐሊ ሰይድ ዐብደሰ ወመለሀይ ንዳሉ ላቱ ግርመ አስመሮም፤ እት ልብ ዎሮት ለኢትሰወረ ወለ ኢትክየለ ሸርሕ እግሉ እግል ለአስመዖ አክራናቶም ሐሳሐሰው። ሰላም ሐቆለ አቀደመው፤ እብ መናበረተነ ወወቀይነ ትሰአለውነ። ሐቆ እለ እተ እግሉ ሓሳባም ለዐለው ምህም ጋር እጅትማምም እቱ አተው። ክሉ ለሸብሃት ስር ወሰራሪት በትከ። ትንፋሰ ለለአፈግር መክሉቅ ክምሰል የሀለ እቱ መሰለ ክሉ ለድዋራት። ሕናመ እግል ምን አፋሆም ለትፈግር ዘዐት እግል ንስመዕ እዘን ከር አበልነ ከአተንሴናሆም።

ልተላሌ . . .

ብሔሥ ሐርስ - ሽከረት ወመቶር ዘበናይ ሐርስ (2ይ ክፋል)



አሰይድ ጸጋይ ብርሃኑ

አትሓያስ አዝረአት
ወጠንያይት መክሰሰት ብሔሥ ሐርስ ምስል ኩሉ ተሐድያተ፡ እት አትሓያስ አዝረአት ሸበህ መትቀዳም ክም ሰጅለት አሰይድ ጸጋይ ብርሃኑ ምስል እለ መጀለት እተ ወደየ መቃበለት ሸርሐ። አትሓያስ ዘርእ፡ ምሮት ምን ኣግደ ሰትራተጅያይ አውለውያት ናይ እለ መክሰሰት ብሔሥ ክም ቱ ለሐበረ አሰይድ ጸጋይ፡ ወጠንያይት መክሰሰት ብሔሥ ሐርስ እብ ሕሰር ዛይድ እንዲ ጸብጠቱ ናይ ብሔሥ ወራታት ለትወዴ እቶም አጅናስ ምን ኣካል፡-

ማሼለ፡ ብልቱብ፡ ሸጂር፡ ሸንጋይ ወዕፋን ገብኦ እት ህለው፡ ምን ብቁልያት ህዩ ዐተር፡ ዐደሱ፡ ዐይኒ-ዐተር ወአደንገል ክም ቶም እሙር ህለ። እምበልሁም እት ናይ ዜድ አዝረአት ሄራር ረዩም ልታኬን ምንመ ለህሉ፡ እት ሰምሰም፡ ዜድ-እድር፡ ሱፍ ወግጥን ዲዐም ሕሰር ክም ትወዴ ልትአመር።

አስክ እለ ምን እት ሐልሐሉ፡ ጋሕቱላይ፡ ሸዕብ፡ አቁርደት፡ ሻምብቁ፡ ሐጋት ወገሉጅ ለህለየ



ብሔሥ እት እዳረት ምድር

ህለው። ምን እሎም 7,756 ኩንታል ዘርእ ድንሹ፡ 3,300 ብቅል በናን፡ ዝያድ 4 አልፍ ኪሎ ዘርእ ሐምሌ ክምስልሁመ 4 አልፍ ሸትለት ምን ፍሬታት መሌሕ (citrus) እት ሐረሰቶት ትወዘዐ።

በሐስ ሕማማት አዝረአት ወሐምሌ'መ ለምህም ሸቅል ናይ እሊ ፈሬዕ ሰበት ቱ፡ እትሊ መጃል ለአግደ ሕማማት ወባልዲን እንዲ ትፈረገ፡ ለልክህሉ አጅናስ ብቅል እግል ልፍረው ወልውጃዶ ጅህድ ትፋድ ገብእ ዐለ። እብሊ ህዩ፡ አስክ እለ 26 ሕማም ዘርእ ልትፈረጎ ዲብ ህለው፡ 3 ሐዳይስ ባልዲን ክምስልሁመ 2 ሐዳይስ አስዕር ሀረም ተአመረው። እብ ተውሳክ እግል እሊ አምራድ ወባልዲን ብቅዕ ላቱ ብዞሕ አጅናስ ድድ ሀረም ወድድ ባልዲን ወሕማማት ሕፋዶም ክም ህለው ልትአመር።

ብሔሥ እዳረት እት አርዛቅ ጠቢዐት



ብልቱብ ወጃብ - እብ ብሔሥ

ብሔሥ ትርበት፡ ማይ፡ ሸፍር ወብዕድ እግል አክዶት በቃዕት ሐርሱ፡ ምሮት ምን ዐባዩ ዐነዲ መክሰሰት ብሔሥ ሐርስ ቱ። እብሊ ህዩ፡ አስክ 2021 እት ዐለት መደት፡ እሊ ቅሰም ዝያድ 15 አልፍ ናይ ጨበል፡ ዝያድ 400 ናይ ማይ፡ ዝያድ 1,300 ናይ አትክል አው ብቅል፡ ቅያስ 80 ህዩ ናይ ሸፍር መርመራታት እት ላቦራቶሪ እንዲ ገብኦ እግል ከስሶም መትነፈዐት ተህየበ። እምበል እሊመ ክልኦት መርጀዕ ቅያስ ሸፍር እት ማሼለ ወሸንጋይ እንዲ ተመ፡ እግል ሸቅል ብርንቶ ገብኦ። እት ዝያድ 50 አልፍ ሄክታር ምድር ሕፍዝ ተኸጢጥ ትርበት ገብኦ፡ ሸብህ ከሪጠት ጨበል ህዩ ትዳሌት። ናይ ደውለትነ ከሪጠት መትወጣይ ትርበት ሐርስ (Soil Suitability Map) እግል አዳላይ ላኪን ሸቅል ትፋድ ልታኬን ህለ።

ውሕደት ብሔሥ ዕጩይ

ወሐዋናት ከደን ናይ እሊ ፈሬዕ እብ ጀህተ፡ 1,819 ኪሎ ግራም ናይ 39 አስል ዕጩይ (22 ምን ቀበት ዐድ፡ ወ17 ምን ካርጅ) ጀሚዕ እት ህሌት፡ 811 ኪሎ ግራም ናይ 29 አስል ቀባይል ዕጩይ ህዩ፡ እግል ሸቲል ትወዘዐው። እምበል እሊመ እት 52 ቀባይል ዕጩይ ወ59 ዴማት ዘርእ (provenence) እግል ዋጅበት እዳረት ዕጩይ፡ ናይ ሚመዮት ወሕርያን ወራታት ገብኦ ዲብ። እት ረአሱመ እት አቅሊም ምግብ (መርሐኖ)፡ እት አቅሊም ግብለት (ምዴርየት ድባርዋ)፡ እት አቅሊም ጋሽበርክ (ምዴርያት ሻምብቁ፡ አቁርደት ወገሉጅ) ክምስልሁመ እት ገሌ አውካድ እት ገሌ ባካት አቃሊም ዐንሰበ ወቅብለት በሐር ቀየሕ፡ እግል ሕፍዝ ለገብኦ ለትፈናተው አጅናስ ዕጩይ ወከተክት ክም ትሸተለው ወእብ ትሉሉይ ወራታት ብሔሥ ክም ገብእ ዲዐም ልትአመር።

እት ብሔሥ እዳረት ሐሰያት ህዩ ዲብ ገሉጅ ወሻምብቁ፡ ለትፈናተ አሸቃል ናይ አክረት (4,800

2021 እት ዐለ ወክድ፡ ምን ሕማም ሕር ላቱ ቅያስ 150 አልፍ ኩንታል ዘርእ ድንሹ እንዲ ፈረ ዲብ ሐረሰቶት ክም ትወዘዐ፡ እግል ወጠንያይ እተይ ድንሹ ህዩ እት ቅያስ 160 ኩንታል ምን ክል ሄክታር ክም ወቀለዩ ልትአመር። እሊ እብ ደረጃት ወጠን ለዐለ ተቅዩም ድኢኮን፡ ለኩሉ መራዐያት ለወደው ሐረሰቶት አስክ 450 ኩንታል ድንሹ ምን ኣሮ ሄክታር እግል ልርከቦ ክም ቀድረው ወሳይቅ ብሔሥ ሐርስ ለአክድ። ለዐቤት ዐውቱ ናይ እሊ ወዘያት ዘርእ፡ እብ ሰብሰ ሕማማት እት ወክድ ሐጨር ልትቀየሮ ለዐለው አጅያል ድንሹ፡ እትለ መደት አዜ እምበል አትካራም እግል ትሉሉይ አጅያል (እት ገሌሁ አስክ 9ይ ጂል) እግል ልብጽሖ ለቀድረው ሐረሰቶት ክም ህለው ልትአመር። እምበልሁመ እት በናና እበ ገብኦ ዓበዮት ቲሹ፡ ምን ሰነት 2018-2022 ዝያድ 2000 ዕንጌሽ ብቅል ዕጩይ በናና እብ ቲሹ-ካልቸር እንዲ ትዘረኦ እት ሐረሰቶት

ትወዘዐው።

እትለ መደት ጎነ ዲብ ዐድነ ለሕሰር ዛይድ እንዲ ተህየበዩ ልትሸቂ ዲብ ለህለ ወቀይ ዓበዮት ቲሹታት በህለት ቲሹ-ካልቸር፡ እት ተመር ቱ። እሊ ወቀይ እሊ እት እንቡተቱ ምንመ ለህሉ፡ መጥመጥ፡ ምን 2018-2021፡ እብ ዘበናይ ቲሹ-ካልቸር ለሐልፈ፡ ዝያድ 7,800 ሸትለት ምን ተመር ምን ካርጅ እንዲ ትገረሀ፡ እት አቃሊም ቅብለት ወግብለት በሐር ቀየሕ እት ሐረሰቶት ወመክሰሳት እንዲ ትወዘዐ ሰኒ-ሰኒት ፍገሪት ለህይብ ህለ።

እሊ ለትህደገ ቲክኖሎጂ፡ እት ቅድየት ደማኑት ጣቀት ወብቅዕት መቅደረት አዳም ለህለ ተሐድያት ትባልሐ ምን ገብኦ፡ እት አፍረዮት ምን ሕማማት ሕር ላቱ አዝረአት ተቅዩር አሳሲ እግል ለአምጽኦ ክም ቀድር ሰእየት ህሌት።

እግል መሰል፡ ምን ሰነት 2016-

ተቅሪር እጅጉመዕ ሜርሐት መትጋውረት ሱዳን ለተን ድወል

ርኢስ ኢሲያስ አፈወርቂ እብ ዐዙመት ርኢስ ዐብደልፈተሕ አልሲሲ ዲብ እጅጉመዕ ሜርሐት ድወል ግዋሬ ሱዳን እግል ልሻርክ ዮም 12 ጁላይቱ አስክ መስር ለሳፈረ።

ዲብ እድንያይ መከረዩ ዋያራት አልቃህረ ዲብ በጽሐ እቱ ወክድ ወዚር ሽባብ ወርያደት መስር ዶክቶር አሸረፍ ሱብሐት ትክበተዩ። ሐቆህ ዲብ ዳሌት እሉ አነነት ሂልቶን ሆቴል በጽሐ። ሐቆ ዕርፍ ሐጫር ዲብ ስያታት ገጽ ምሴ ምስል ወዚር ካርጅየት ጀምሁርየት መስር ሳምሕ ሹክሪ ዲብ ሀወኖት ቀድየት ጀምሁርየት ሱዳን ለረከዘከት መዋጀህት ወደ፤

ምኑ እንዴ አትለ ዲብ እጅጉመዕ ግዋሬ ድወል ሱዳን እግል ልሻርክ ምስል መጽኦ ርኢስ ጀምሁርየት ግብለት ሱዳን ሳልሻከር ምያርዲት ዲብ አስከቦት ቀድየት ሱዳን ለረከዘከት ህድግ ወደ። ሐቆ እሊ አምሱይ ምስል ርኢስ ወዘረእ ፈደራልየት ጀምሁርየት አቶብዩ ዶ/ር አቢ አሕመድመ ሕድ ለትሹብህ መዋጀህት ዲብ አክሰቦት ቀድየት ሱዳን ወደ።

ከሚሸ ዮም 13 ጁላይ ርኢስ ኢሲያስ አፈወርቂ እጅጉመዕ ሜርሐት ግዋሬ ሱዳን እንዴ ኢለአሰብዴ ምስል ርኢስ ጀምሁርየት አምስር ዐብደልፈተሕ አሲሲ እንዴ ትዋጀህ ምስሉመ እብ ሰበት አስከቦት ወሀወኖት ቀድየት ሱዳን ሀድገ።

ክልኢቶም ሜርሐት ዲብለ እት መዲነት አልቃህረ ዲብ ዴዋን ሕኩመት አል እተሓደዮ እተ ለወደወ ህድግ ዲብ አስከቦት ቀድየት ሱዳን ክምሰሁመ ናይ ክልኢቶን ድወል እብ ሕበር ለከሰሰ ናይ መንጠቀት ወእድንዩ ቀድያት ፋዩሕ ህድግ ወደወ።

እምበል እሊ ርኢስ ኢሲያስ አፈወርቂ ምስል ርኢስ ጫድ እድሪስ ደቢ እንዴ ትዋጀህ ሕድ እትለ ሹብህ ቀድያት ሀድገ። ሐቆ መዋጀህት ክልኢቶም ህዩ ለሚርሐት ለሕሱብ ዐለ እጅጉመዕ ሜርሐት ግዋረ ድወል ሱዳን አስተብደ። ዲብ እጅጉመዕ መስር፡ ኤረትርየ፡ ሊብዩ፡ ጫድ፡ አቶብዩ፡ ጀምሁርየት ምግባይ አፍሪቀ፡ ግብለት ሱዳን ክምሰሁመ ርኢስ መፈወድየት እተሓደ አፍሪቀ ወአሚን ዓም አልጃምዐ አልዐረብዩ ሻረከወ።

ዲብለ እብ ርኢስ መስር ዐብደልፈተሕ አልሲሲ ናይ መክሰቲ ከሊመት ወረኣይ ሕኩመት መስር ለአስተብዴት መሓደረት፡ ክሎም ሜርሐት ነዮም መሓደረት ቀደመው፡ ርኢስ ኢሲያስ ዲብ ቀደመዩ ከሊመት፡

“ሓይስ ርኢስ ጀምሁርየት መስር ዐብዱል-ፈታሕ አል-ሲሲ፡ እግል እሊ እጅጉማዕ እብ ነዘዋትክ ወመትከባትክ ሐምድ። ኤረትርየ ህዩ ክእኒ ለመስል እጅጉማዕ ድወል ጄራን እግል ልግባእ ተአይድ

ወዲመ ትትላኪ። እለ መባደረት እለ መሻክል ሱዳን እግል አርሃዮት ካፊ መካኒዝም በ ወዐቢ በክትቱ። ሱዳን ወሽዐብ ሱዳን ህዩ እብ ሰዳይት ጄራን ሐዉ እብ ክእኒ ለትመስል መባደረት ምነ ሽሙም ዲብ ለህለ እግል ልንገፍ ወሐርብ እግል ለኣብዋር ዐቢ በክት ራክብ ህለ።

እለ መባደረት እሉ፡ እበ ለህለ እለ አሳሲያይ ስያደት ወሕርየት ሱዳን እግል አሕተረዋት ለትአክድተ። ምን እለ ለህሌት ሓለት እግል ትፍገር ስታት፡ ጅህድ ወሰዳይት ግዋሬ ድወል ሱዳን ህዩ ምህምቱ። አግደ ሀደፍ ናይ እለ መባደረት፡ ሽዐብ ሱዳን እብ ሕርያኑ ወምራዱ ሐል እግል ልርከብ ወምን እሊ ሐርብ እግል ልንገፍ ቱ። ክለን ድወል ድወል መትኣታይ ዐስከሪ እግል ሱዳን ዲብ ሐርብ ለበልሰ ሰበትቱ እንዴ በዋረ ሽዐብ ሱዳን እግል ልሲደዩ ለአስትህል።

እለ መባደረት እለ ሱዳን ዲብ በረል-አማን ለትትዐ ዲብ፡ ሰላም ወአምን ሱዳን ወግዋሬ ድወል እግል አክዶት፡ ናይ ሕበር ጅህድ፡ ወናይ ሕበር ፈህም እግል ጅምዐት ዐቢ በክት ቱ። ለትብጽሐ እግል ሕፍዘት ህዩ እት ሐንቴለ ገብአት ትግባእ ናይ እንሳንዩት ወዐስከርየት እበ ትብል ምስምሰ ለገብእ መትኣታይ ካርጅ በክት ኢህበት ወንክረት።

እለ ሰኔት መባደረት ተ። ላኪን ብዳየት እግል ናይ ረዩም ሄራር ተ። ለሰበብ ሽዐብ ሱዳን ምን እለ ለህለ ዲብ ሓለት ደግሸ እግል ልትባላሕ ወክድ ወጸገም ትሩድ ለጠልብ ሰበትቱ። እሊ ህዩ ክመ ዲብ መእተይ ህግያይ ለእቢሉ፡ እት ሐንቴ ጽላል ግዋሬ ድወል ሱዳን፡ ዋድሕ መካኒዝም አሳሰ ለቡ ሐል እግል ለህሌ ቡ። ሽዐብ ሱዳን ህዩ እብ መቅደረት ወርዘቅ ግዋሬሁ ሐል ዲብ ርክበት መትነፈዓይ እግል ልግባእ አግቡይ አጣፍሐት ምህምቱ።

እምበል ናይ ካርጅ መትኣታይ በህለቴ፡ ግዋሬ ድወል ሱዳን፡ ሱዳን ዲብ በርል-አማን እግል ትትዐዴ መርሐለት ወካፊ መቅደረት ወቅወት ሰበት በንቱ። ምስሉመ እትለ ሓድረት ሓለት ሱዳን ዲብ ሌጠ እግል ንረክዝ አለብኪ። እሊ ገብእ ለህለ ሐርብ አሳሰመ አለብኪ። እግልሚ አዜ ለትሐዜ ህለ ወእግል ንረክዝ እቱ ለብኪ ለእግል ሱዳን ስያሲያይ፡ እጅጉማዕያይ ወእቅትሳድያይ ደማር ሱብብ ለዐለ ሙደምራይ ንዛም ለአውደቀ ሽዐብ ሱዳን፡ ሰላም እንዴ ረክበ እብ ገበዩ ህዩ እግል ናይ ግዋሬ ድወል ሱዳን ሰላም ወአምን አድመኖት ቱ።

ብዕድ ምን እሊ እብ መትበጋሴ፡ እለ በዳሪት እለ ለትትሐመድ ተ። ላኪን አስክ ረዩም ለለአቀምት መባድእ ሚካኒዝም እግል ለህሌ እለ ወጅብ። እሊ አዜ እንርእዩ ለህሌን ከብቱ ወበዳሪት ግዋሬ ድወል እበ ህለ እለን ታሪካይት ዕላቀት ለትትሐመድ ተ። እሊ

ህዩ ለዲብ መንጠቀት ቀር አፍሪቀ ወበሐር ቀየሕ ግብለት ወቅብለት ክምሰልሁመ ምውዳቅ ጸሓይ ለህለ አከይ መቅርሕ እግል አሰኮት ባብ ለከሰት ቱ።

ዲብ ደንጎበ እግል ወዴካሁ ጸገም ሐምድ፡ መዳለት ለአክድ፡ እለ በዳሪት እለ ህዩ ስርግልት ክምሰል ትገብእ ሸክ አለብዩ ወሹክረን።”

ክሎም ሜርሐት ድወል ከሊመቶም ክምሰል አስመዐው፡ ድቡእ እጅጉመዕ ቱ ለገብእ፡ ግራህ እጅጉመዕ ህዩ ናይ ሕበር ሸሬሕ እብ ርኢስ ዐብደልፈተሕ አሲሲ ቀርቡ።

ናይ ደንጎበ ሸሬሕ ወዕለ ግዋሬ ድወል ሱዳን እትለን ለተልዩ ንቀዋ ልትከምከም፡

1. ዲብ ሱዳን ልተላሌ ለህለ ደግሸ፡ ናይ አምን ወእንሳንዩት ቴለል ሱዳን አሰፋ ዲብ ሸሬሕ፡ ለመትሓርበት ጀሃት ለሐርብ እግል አስከቦት ሻፍግ ወዳይም አብጠርት ዘብዋ እግል ልግበእ፡ መ ክምሰልሁመ ሐያት ለጻሕ ሽዐብ ወጀሬ ለህለ ደማር መምተለካት እግል ልብጠር ለልብል ቱ።


2. ስያደት ውሕደት ሱዳን ሐሸዋት፡ ዲብ ቅደይ ከርስ እዴክ ይኣተዮት፡ እግል እሊ ገብእ ለህለ ደግሸ ክምሰል ቀድየት ከርስ ርእየት፡ ክምሰልሁመ ለገብእ ልግበእ ናይ በረ ጀህት ዲብለ አከይ መቅርሕ እዴ ይኣተዮት።

3. አህምየት ሕፍዘት ሱዳን ወመአሰሳት፡ ደውለት እግል ኢትትፈንጠር ዳፈዶት፡ ዲብ እርሃብ ለዋሌ ለገብእ ልግበእ ለትነዘመ መዋዲት ጀራይም ሰበት ዋሌ ክምሰል ደረር ናይ እሊ ህዩ መንገፎ ወጠን ግዋሬ ድወል ናይ እለ መንጠቀት ዲብ ብቆት ለካሬ ሰበት ገብአ።

4. ምስል አተላለዮት ናይ እሊ ደግሸ፡ ሙትሻዕትረት እግል ልወሰኮ ወምነ ደግሸ ለሀርበው አንፋር አስክ ድወል ግዋሬ እግል ልብዘሐ እት ወግም እንዴ አተኩ፡ ለህሌት ሓድረት ሓለት ወመደረተ ክብድት ሰበትተ እበ ትትቀደር ጋብሆተ።

5. እት ሱዳን ቴለል እንሳኒ እት ልትኬለም ገይሰ ሰበት ህለ አሰፋ እት ሸርሕ፡ እት ረኣሰ መደኒ መአሰሳት ዓፍየት ወከደማት ገብእ ለህለ ትሉሉይ ህጁማት እት ሰቅቅ፡ እግል ክሎም እንክራት ሙጅተማዕ እዲን እግል ለህለ መስደድ ወመሐገዝ እግል አርሃዮት ሻፍግ ረድኤት እግል ለሀሆ ክሉ ለልትቀደሩ ጅህድ እግል ሲዴ መትላካይ እት ገብእ እሊ ህዩ፡ናይ ነብረ፡ ደወ ወራዳዮት ዓፍየት፡ እግል ከባደት ናይለ መደረት ክምሰል ለርሄ ወለሀውን እግል ልግበእ መጽጋም።

6. ምስል ለከሰሶም ናይ እድንዩ መአሰሳት ወተናዚም እብ ነሰቆት፡ እብ ገበይ ድወል ግዋሬ እንዴ ወደ እግል ሱዳን ለልትሀዩብ



ናይ እንሳንዩት ሰዳይት እትለ ከሰሶም ጀሃት ክምሰል ልውዕል እግል ልግበእ ጅህድ ለትሐዜ። እሊ ህዩ እት ቀበት ሱዳን አስክለ ዝያደት ደረር ለጀረ እቱ ደዋራት እግል አብጽሖት ህዩ ደማን ለበ መዐደዩት ገበይ እግል ተህሌ አትናያት።

7. እግለ ለአተላሌ ለህለ ደግሸ አብጠርት ሐል ስያሲ ሰበትቱ፡ እግል ተናዚም ሱዳን ለልሓቅፍ ህድግ አሰብደዮት።

8. እብ ሰበት መሻክል ሱዳን እብ ደረጀት ውዘራእ ሕሰር ካርጅየት ድወል ግዋሬ ለጅነት ውዘራእ እግል ትትአሰሱ፡ ዲብ ጀምሁርየት ጫድ ህዩ ናይ ሰልፍ

እጅጉመዕ እግል ቱዴ ለልብል ዐለ።

ዲብ ደንጎበ ርኢስ ኢሲያስ እብለ መናሰበት እለ ምስል ምህም ላቶም ሱዳንይን ሀድገ። እትለ ዝያረት ወዚር ሕሰር ካርጅየት አሰይድ ዐሰማን ሳልሕ ወንምያይ ርኢስ አሰይድ የማኔ ገብረኣብ ምስል ርኢስ ኢሲያስ አፍወርቂ ሱፋራም ዐለው።

ርኢስ ኢሲያስ አፍወርቂ ዲብ ጀምሁርየት መስር ናይ ሰለሰ አምዕል ስርግልት ዝያረት እንዴ አትመመ ዮም 14 ጁላይቱ ዐዱ ለአቅበለ።

ሴሚን ዐሰማን ዐቢ



ዋርሳያት ለዴሞክራሲ እና ለሰላም



ሳዋ ለሐልፈተን ሰንበት ንኢሽ 15 ጁላይ፡ አንፋር 35ይት ደውረት ክድመት ወጠን እተ አድሐረት ዲበ መናሰበት ውዕላም ዐልኑ።

ዲቡ ለረከብናህን አዋልድ፡ እተ ምን ደዓም አሰክ አዜ እት ሳዋ ለክልኢያህ መደት ለትፈናተ ቅድራት፡ ከህላት፡ አምር፡ እጅትማዕየት፡ በሻለት ፍክር ወትርድ ገርብ ክም ረክበዩ፡ እግል ዝያደት ተጠውር ህዬ፡ እበ እሉ ረክበ ንቀዋ አሰክ ኩልያት እንዴ አተጅህዩ፡ ሸበን ወደውለተን ክም ከድመ አክደዩ እግልኑ። ህተን ዲብ ገጸን ሰጸየት ወመስተቅበል ባርህ ልትቀረጸ።

ዲብ ሳዋ መጦር ውላድ ሐወን ኩሉ ኢልትቀደር ልቡለን ለዐለው ወራታት እብ በቃዕት ውቅል እንዴ ተዐርረዩ፡ እት አምዕል መድሐራትን እበ ልባሰ ሕሽመት ልባሰ ዐሰክሪህን ቱ ጸንሐዩ። እብ ክሰሰ ሳወ ወመናበረተ ተሃጀኮ ምስለን፡ ከለሀበያኒ ተ ሐብሬ እብ ዘያታተን፡

ሳብሪን መሐመድ ሰዲድ ዑስማን ምን መድረሰት 2ይት ደረጃት ቀይሕ ባሕሪ አሰመረ ሳወ ለትከሬት ተ። ከሳወ ከአፎ ክም ጸንሐተ ዲብ ተሓኪ፡ “ሳወ ክመ ምን አፈቶ ብዕዳም ለትሰምዑ እንዴ ኢትገብእ፡ ክም መድረሰት ዐባይ ወአካን እጅትማዕየት እት እንተ ረከብክወ። ምን ክል ርክን ኤረትርዩ ለመጽላዩ ሰንዩ አዋልድ ምስለን እነብር። ዲበ መድረሰት ህዬ ውላድ ወአዋልድ ምስል እንደርሰ ወንትጃገር” ትብል።

ሳብሪን መዳሊተ እግል ሳዋ ምን ቀዳሙ ከፎ ክም ዐለ ዶል ትሰክልክወ፡ “እት መድረሰትን ክል ሰንበት-ንኢሽ ደጉም ድሩሰ ወዱ እግልን ዐለው። እምበልሁመ አፍሱል ዝያደት ክም (Tutorial) እንደርሱ ወኖሼመ ምስል ዐልኮ

ዲቡ መጃል ዕሉም አደብ (Art) ለገይሰ እቀርእ ዐልኩ። እት ሳዋ ክም መጽሐፍመ ምሴ ደጉም ድሩሰ ናይ ታሰዓይ፡ ዓሰራይ ወዐስር-ሐቱ ፈሰል ለሀይቡን ወአሰቡሕ ህዬ ምህሮ 12ይ ፈሰል እነሰእ። መደርሲን መድረሰት ዋርሳያ-ይክኢሉ ፈዳብያም ቶም፡ ሰኣላት እንዴ ጠብዐው ለሀይቡን። እት መክተብትመ እግል ቀርእ አክትብት ካፊ ህለ እግልኑ። በሰ ገየት ድራሰት ለቡ እንሰር ደርሱ። መደርሲንመ እት ወክድ ዕርፍ ትገይሶም ወደለ እለ ትሰክልካሆም እተ ሰዳኩ።

“እት ሳወ ለወቅት ወለሰታት ኖሱ ንዘም ቱ። ወቅት ቅራኣት ናይ ላሊ ህለ፡ ዲቡ እምበለ ቀርእ ሕም ለልኣፈግር አለቡ። ወቅት ሰኩብ እመር፡ ወቅት ብለዕክ ወግያሰ መድረሰትን ኩሉ እብ ንዛም ሰበት ቱ። ኖሰክ ገየት እንዴ ወዴክ ለሰታት እት ፍዕል አውዐልክ ምን ገብእ ትትዐወት። ምን 8:00-10:00 ላሊ ሳዐት ሕፍዝና ቱ። ሐቀሁመ እግል ትሰክብ ምን ተሐዜ ትሰክብ ወሕፋዘት አተላሌ ምን ትብልመ ተአተላሌ።

ሳወ ለሓላት ጀው ሕፋን ሰበት ቱ። ዲበ ሀወእ ለረክበ ዲቡ አካናት እት ልትገሰዩ ወለሐፍዙ ቀደሚሆም ለዐለው ዙራት ለዘርአዉ ዕጩ ህዬ ሰበት ዐበ ወገምለ እት ሐንቴህ ዲብ ለአጸለ ለጀው ክም ልትላመዳሁ ክም ወደዩ ሳብሪን ተሓኪ።

መሻረከት አንሳት ዲብ ሳወ ዮም ዓመት ውላድ ወአዋልድ ሰር እብ ሰር ዐለው። ምናተ ለአዋልድ ለምን ገሊሁ አቃሊም ማጽኣት ሐዳት ተን። ከመሻረከትን እግል ቲዚድ ሚ ትብሊን ክም እቤለ ሳብሪን፡ “ ሳወ ምን ውላድ ወለዐል አንሳት እግል ልምጸኣህ በን እብል፡ ሰበቡ ከፎ ምን ጼዋህን በረ ለህሌት መንበረት ቀድራ፡ ነፍሰን ለአተርደ ወሐንገለን በንዩ ሰበት ደርሱ፡ እግልን ዝያደት ተአደቅቦን። ደቅብ አንሳት ህዬ እት ምህሮ ሌጠ ኢኮን። እት አሸቃል ኬወ፡ ርያደት፡ ዓፍየት ወነዳፈት ወእት ኩሉ አሸቃል ለብዕድ መጦር ውላድ ክም ተን እብ ፍዕል ለልኣርእየ እት አርደት ተ።

ሳወ ምህንት ምን ሰንክ ለትደርሰ ዲበ መድረሰትማ ተ። መሰለን ፍዕሉ ውብሰር እዴ ምን መልህያትከ



ትደርሱ፡ ደለ ለአምራሁ ብሰር መንበረት ክሉ ለአፍህማካ ቱ። እምበልሁመ እጅትማዕየት ወንዛም ወቅት ትደርሱ።

ሳብሪን እት 35ይት ደውረት፡ ንዕመ ሕተ ዲብ 33ይት ደውረት ወዋልዳይተን ዘህረ ዐለ ከድር ህዬ ዲብ 3ይት ደውረት ኩለን ሳዋ ለአፍራተን ተን። እለ ሄራር እለ ህዬ፡ ለዋርሳይት እም ዋርሳያት አዋልደ ተዐልም ክም ህሌት ልትረኤከ። ቀደሚህ ሳዋ ክራት ለዐለት ንዕመ ንቅጠት ዲግሪ እንዴ አምጸኣት ቱ አሰክ ኩልያት ለትዐዴት። ሳብሪንመ ንቅጠት ዲግሪ እንዴ አምጸኣት ቱ አሰክ ኩልያት ዐዲ-ቀይሕ እትጅህት ለህሌት። ከሳብሪን ትብል፡ “እነ ደርብ እምዬ ወሕቼ ዲብ እካይድ ሐበን ልትሰመዐኒ። እግል መልህያቼመ ምን ዓይለትን እምዬ ወሕቼ ሳዋ እፍራተን ተ ዶል እብለን፡ ብዙሕ ለአሸነ። አንሳት ህዬ፡ እብ ሳዋ ቱ ሙስተቅበለን ወሐያተን ዝያደት ለበንዩ ወዐዳለት እጅትማዕየት ክም ህሌት ለልኣክደ” ትወሰክ።

ተሃኒ በሺር መ/ኢብራሂም፡ ሳዋ እንዴ ኢትትከሬ ብዙሕ እት ሐያት እጅትማዕየት ናይ ሕበር አትየት ኢኮን። ምን ዐደ ህዬ እግል ሐቱ ላሊመ በረ ምዩት ኢትአምር። ከህተ ትብል፡ “ሳዋ ብዙሕ ተዐልመኮ ምን፡ ምስል ብዝሓት ሰንዩ ከአፎ እብ አክላቅ እትናበር፡ ተጃርብ ከሰብ። እነ በዲር ምስል አዳም ዕላቃት ወመፋህመት አምር ይዐልኩ። አዜ ላኪን ምስል እለን ሰንዩ ሰበት ተአመርኩ፡ ዲብ ክል አቅሊም መልህያት ብዝሓት ዋድየት ህሌት። ክም ሐዋቼ ቱ ለእርእየን።

መረብዩኖም እት ወሰፍ ህዬ ተሃኒ፡ “ምረብዩንን ዲብ ሳዋ ክም እምን ወአቡን እንዴ ገብአው ምን ምዕል እትየትን አሰክ ነኣተምም፡ እግል ኢንሕመም፡ ኢንሰፍሬ፡ ኢንዕረቅ፡ ኢንትሐንዝ፡ እት ድሩሰን እግል ኢንትህመል፡ ትሩዳት ወመትጃግረት እግል ንግበእ ወአክይ አደብ እግል ንወርኬ ላሊ ወአምዕል ምስልን ተርሆ። ምን ጃዝናመ እግል ርሕና ቱ፡ ወምን ልትብኣሱን እት ክምስልህ። ሕነ እብ ገበይ ሰይት እግል ኒጊሰ ወንትሰየሕ ሰበት ለሐዘና ቱ። ‘ድረሶ፡ ዛክሮ፡ እለ አካነት እብ መድረሰት ቱ ረኣሰክ



ሳብሪን መሐመድ ሰዲድ



ተሃኒ በሺር

ለሸንን እተ ወለዐል ለትገብእ’ እት ልብሉን መክሩን” ትብል።

“ሳዋ አካን ድራሰት ቱ፡ አክትብት እብ ረኪሰ ልትዘቤ ዲብ፡ መዳሊትክ ዲብ አቃሊም ሐዋን ዐለ ምን ገብእ፡ ዲብ ሳዋ እግል ትረሸዱ ትቀድር። መደርሲን ሕሩያም ቶም፡ ትሰክሉን ወለኣቤት እኩም መስኣለት ምጽኡን እበ ልብሉከ። አሳሰ ሙስተቅበልና ተ ሳዋ።

እግል ሻባት ሰንክ ሚ ትብሊን እት ልብል ሰኣል ተሃኒ፡ “እለን ምን ሳዋ ለልትሻከፈ አዋልድ፡ ሳዋ ጊሰ ከትዐለመ እብለን። አዳም ለልብሉ ሀገጊት ኢትሰመዐ። ሳዋ ለይኣሰቱ ወለት ኢትሰይ። ሰበቡ ህዬ፡ እግል አዋልድ ሳዋ አካን ሕሽመተን ተ። ሳዋ ለእለ ይኣሰይት፡ ኢትኣኪ። ምን እት ቤተን ለህለዩ አዋልድ እብ አደብ ለዲብ ሳዋ ህለዩ አዋልድ ለሐይሰ። ሰበቡ ህዬ፡ እት ቤትክ እየ ክም ዐልክ ዋልዴንክ ብዙሕ ኢራቅቡከ፡ እት ሳዋ ላኪን እየ ክም ጊሰከ፡ ለገብኣት ሐረከትክ እብ እጃዘት ወመራቀበት ሰበት ቱ፡ እብ አደብ ወንዛም ቱ ለሐረካትክ” ትወሰክ። ተሃኒመ እት ምህሮ ምን ቀዳመ እት ቤተ ብዙሕ ዱሊት ወጅህድ ዋድየት ሰበት አጸንሐት፡ እበ እት ሳወ ለከልኣቱ አውረሐት ሌጠ ለሐፍዙቱ ድሩሰ ናይ ሸሃደት ንቅጠት እንዴ ረክበት አሰክ ካድም ዐማር ውተዋዊር ብግሰት ህሌት። ሸሃደት እምጽኣም ለህለው ህዬ፡ እት ሄራር ዐማር ወክድመት ወጠን ለሐሰ ዐጀል ጀላብ እግል ልግብኡ ሕኩመት መጦር አካዳሚ፡ ምህናት እግል ተአድርሶም መዳሊት ገብእ እሎም ክም ህለ ለትፈናተው መስኡሊን ለአክዶ።



አርዛቅ

በሐር

መዳልያይ፣ ሳይሞን ሚካኤል ተርጀመት፣ ሰልሕ ገመ

ምን ሰነት 1994 እንዴ አንበተት ውዛረት ርዝቅ በሐር እግል ዲብ ግንራራብ በሐር ሌጠ ክሩዕ ለዐለ ደክል መጃል ዓለ አስክ ከዛናት እግል አርሐቦት ብዙሕ ጅሀድ ወዴ ጸንሐት ወሀሌት። ዲብ ሰነት 2008 ህይ ዲብ ክሉ አቃሊም ዐድነ አፍረዐት እንዴ ከሰተት፤ እብ ሰብ መቅደረት ናይለ መጃል ፈሀም ሙጅተመዕ ዲብ ዐበዮት ፈርያት ወበቃዐት ዓለ እት ራቀቦት ብዕድ ዐቢ ሸቁል ተአወቁ ጸንሐት። እግል ዲብ አቃሊም እሱሰ ለጸንሐ መትመዳድ ህይ አስክ ምዴርያት እንዴ ትከረ ዲብ ድዋራት ከዛናት ለነብር ሙጅተመዕ እት አፍዝዖት ወአፍሀሞት ከምሰልሀው ዓለ እት ክሉ ክም በጽሕ ትከድም ሀሌት።

እምበል እሊ ምስል ውዛረት እዕላም እብ ነሰቅት ትነሸሩ ለሀሌት ናይ ጀራይድ፣ ተለሺዥዮን ወራድዮ በርናምጃት ዝያድ እንታጅ ዓሴ መትመዋን ወሕፍዘት ዓሴ ጽበዋ በሐር ወከዛናት እግል ሸዐብ ዲብ አትአማር ለትፈናተ ተዕቢኣት ወመሓደራት ተሀይብ ትትረከቡ።

እብ ተቅይም ልትርኢ እት ህለ እት ክለ ወጠን እብ ሕኩመት ምነ ለትበነ ከዛናት ዝያድ 70 ከዛናት ማይ ናይ ጽብጠት መቅደረቱ 100,000 መትር ኩብ ወለዐል እግል ልጽበዋ ለቀድር፣ ቆሪናሁ ዝያድ 4 መትር ለበጽሕ፣ ዓለ ዝሩእ ዲብ ህለ። ምን ተሐት 70,000 መትር ኩብ ማይ ለጸብዋ ላኪን ሰነት እብ ግዲደ ማይ ናይ ሕፍዘት መቅደረቱ እግል ልንቀሰ ወሕዲነ አክሰጅን ውበዝሐ ዓለ እግል ልትሐመል ሰበት ኢቀድር ወናይ ይብሰት መሻክል መ ሰበት ሳድፋ ዓለ እግል ልትዘራእ እቱ ኢልትሐሬ።

እት ኤራትርየ እብ ጠቢዐት ለልትረከብ ዓለ ነዲፍ ማይ ይህላ። ምን ዶል ዲብ ዶል ለልትዘራእ ከዛናት ወአሸራም ላኪን ለትፈናተ ጅንሰ ዓለ ልትረከብ ዲብ። ለሰልፍ ለትዘረኣ ከዛናት ክም ከዋን ዓለበርዕድ ለመሰል እትገብእ፣ እት መደት እስትዕማር ዋልያን ጅንሰ ካርፕ፣ ኩመል አው ካትሬሽ ኢል ለልትህለል ጅንሰ ዓለ ለትዘረኣቱ። ሐቆ እሊ መ እት መደት እስትዕማር አትብዩ ዲብ ሰነት 1989 ከዋን በለዘ ወዓዲሽኽ ክሩሽየ ካርፕ ክምሰልሀው ቲላፕየ ኒሎቲክ ወቲላፕየ ዚሊ ክም ትዘረኣ ወሳይቅ ለሐብር። እብ ሰበብ ሕዲነ ዝላም ገሌ ምነ ከዛናት አስክ የቢሰ በጽሕ ክም ዐለ ውዛረት ርዝቅ በሐር እበ ለወዴቱ ፊራሮ ምን ሐዲሰ ዓለ ክም ልትዘራእ ገብእ።

እት ሰነት 1994 ውዛረት ርዝቅ በሐር መናፍዕ ዓለ ማይ ዋዑም እንዴ ፈሀመት ዘርእ ዓለ ምን ኣቶብዩ እንዴ አምጽአት እግል ብገሱ ለዐለ እቱይ ዓለ ዐድነ ክም ለዐቤ ወዴት። ሐቆ እሊ ትሉሉይ ዘርእ ዓለ እግል አድመፍት ከዋን ማይ-ሰርወ እግል ብሐሰ ወኣትፈረዮት ዘርእ ዓለ ለከድም መክተብ ወናይ ብሐሰ ሰሙይ እንዴ በኔት ዓለ ማይ ዋዑም እት ለትበነ

ከዛናት ዲብ አርሐቦት ጸንሐት።

ቲላፕየ ወካርፕ ለክም ብዝሐ ዲብ ክሉ ከዛናት ለልትረከብ ገብእ እት ህለ ካትሬሽ መ ዲብ አቃሊም ጋሽ-በርኩ፣ ዐንሰበ ወግብለት ፋሩይ ህለ። ዎሮ ምነ እብ ዋልያን ለትአታተ ጅንሰ ኢል፣ ዲብ ከዛናት እግል ልትፋሬ ሰበት ኢቀድራ፣ በህለት እግል ልትፋሬ ዲብ ማይ መሪር እግል ልሳግም ሰበት ልትጀበር በዴ እት ህለ፣ ዔማቱ ወጅንሱ ለኢትአከደ ብዙሕ ድራሳት ለኢገብእ እቱ እብ አዕዳእ ውዛረት ርዝቅ በሐር አፍረዐት አቃሊም “ላብዩ” እንዴ ትበህለ ለልትሰሚ ዓለ ህይ ዲብ ብዙሕ ከዛናት ክም ልትረከብ ለሐብር።

ቲላፕየ
ቲላፕየ ለ እግል ለትፈናተ ድዋራት ውሓለት ጀው እግል ልትሐመል ለቀድርቱ፣ እብ ለቀለት ገበይ እብ ሐርሰ ማይ እግል ልትፋሬ ለቀድር ዓለ ሰበትቱ ዲብ ሰነት 1970ታት “ናይ ማይ ደርሀ” ልትሰሚ እትህለ እትሊ ወክድ እሊ ህይ “ነብረ ዓለ 21 ክፈል ዘበን” እንዴ ትበህለ ልትሰሚ ህለ። ቲላፕየ ሰዓር ለበልዕ ወንኡሽ ክልቀቱ።

ቲላፕየ ሕሩይ ምነ ለወድዩ፣ ለህለ እሉ ሰገ ጸዕደ፣ ጠቢዕያይ ጠምጠሙ፣ እብ ቀላል ገበይ እግል ልትጀለብ ለቀድር ወለ ልትፋሬ ሰበትቱ፣ ውቁል መትሐማል አምራድ ወእኩይ ወክድ ማይ፣ እብ ሻፍግ ለልዐቤ በህለት 500 ግራም እግል ልብጸሕ ሐድ 6 ወሬሕ ሌጠ ለልኣትህዘዩ ሰበትቱ ቱ።

ዎሮ ምነ ዲብ ካምል ዐድነ ለህለ ከዛናት ለልትረከብ ጅንሰ ቲላፕየ ባይል ቲላፕየ እትገብእ መጅብ እት ክለ አፍሪቅየ ንሹር ለልትረከብ ወእብ ደረጀት እዲነ ልትርኢ እትህለ ህይ እብ ብዝሐ ለልትፋሬ ሕሩይ ዓለ ማይ ዋዑም ቱ።

ኢሮክሮሚስ ቲላፕየ እብ ዝይድ ናይ ቤጭ ኣካን እንዴ አዳለ ለወልድ ወክም ፈንቀሐዩ ህይ ዲብ አፍ እብ ሕቅፊት ልትአመር። ናይል ቲላፕየ እብ ሰምጡ ጸቢል ምን 30-34 ቅራፍ ክጡዋ ላቡ ወዲብ ዘገቡ ህይ ንዙም ሽቲዋ ለቡቱ።

ቲላፕየ ዚሊ
ለካልኣይ ጅንሰ ቲላፕየ እት ለበዝሐ ከዛናት ከበሰ ለልትረከብ ዓለ ዚሊ ቱ። ለበዝሐ ወክድ እብ መጃምዕ ሄራር ለፈቱ ከብዱ ቀያሕ ንኡሽ ዓለ ቱ። ዚሊ እብ ሻፍግ ለልትፈሬ ውበዙሕ ዐቦት ለኢኣለቡ ጅንሰ ቲላፕየ ቱ።

ለትሐረ ዲብ ሰኒ ሓለት ጀው እግል ልዕቤ ለቀድር ሐድ 40 ሴንት መትር ቱ። እሊ ላኪን ምስል ሰኔት ሐት ጀው እት ወግም እንዴ ኣቴክ እት አውሎታት ዐድነ እበ ለህለ በራድ ክመ ለትሐዜ ዐቦት ኢለርኤ። እብ ሰበብ እሊ መትሐራዩ ለትደሀራቱ። ዚሊ ዲብ አዋራፍ ከዝን እብ ፍንቱይ አቀዋፍ ለበዝሐ ዲብ እቱ ልትረከብ፣ እሊ ለገብእሱ ለአቀዋፍ ቤጩ እግል ልክሬ ሰበት ልትነፈዕ እቡቱ።

ካትፍሽ
አፍሪቅየ ካትሬሽ መጅብ እት ክለ አፍሪቅየ ንሹር ለህለ እትገብእ፣ ዝያድ ለናሱብ ምስሉ ምን 20-30 ሴንት

ግሬድ ሐፋነት ቱ፣ እብሊ ህይ “ዓለ ማይ ሕፋን” እንዴ ትበህለ ልትሰሚ። እሊ ዲብ መደት እስትዕማር ዋልያን እት ዐድነ ለአሰበደ ጅንሰ ካትሬሽ፣ እምበለ ዲብ ማይ ምን ማይ በረመ እግል ለአተንፍሰ ለቀድር ገሮብ ሰበት መልክ ምን ማይ በረ ክም ፈግረ ረይም እግል ልጽነሕ ቀድር። እምበል እሊ ካትሬሽ ምን ብዕድ ዓለ ለፈንትዩ ቅራፍ ሰበት የኣለቡቱ። ቤልዓይ ክሉ እትገብእ፣ ሰራይር፣ ቁረዕ፣ ተብዕን ወአቀዋፍ ልትመወን።

ካትሬሽ ረኣሱ ዐቢ ወዐጭምት ለቡቱ፣ ዕንታት ነኣይሽ ወአፍ ርሒብ መልክ እትህለ እት በነት አፋሁ 4 ሽክም ለመሰል ገኖበት ወእት አፍልቡ ለህለ ደንበር ለመሰል ንኡሽ ዓጭዋታት ለቡ ለልትራገዝቱ። ምን ዕድዋኑ እግል ልዳፍዕ ህይ ምን ተሐት ማይ እግል ልትሐረክ ልትነፈዕ እቡ።

እብ ብዝሐ ዲብ አቃሊም ጋሽ-በርኩ፣ ዐንሰበ ከምሰልሀው ዲብ ግብለት ለልትረከብ ካትሬሽ ሰጋሁ ብዙሕ እትገብእ ንኣይሽ አሸዋክ ወዓጭዋታት ሰበት ኣለቡ ዎሮ ምነ ሕሩይ ጋብእ ለህለ ዓለ ማይ ዋዑምቱ።

ካትሬሽ እግል ልትፋሬ ምን 1-4 ሰነት ነሰእ ምኑ እትህለ ሐቱ ኪሎ ለትትመዘን አንሳይት እብ ተቅይም ሐድ 20,000 ቤጭ ዲብ ዎሮት ከረም እግል ትሕቀፍ ቀድር።

ካርፕ
ካርፕ ቤልዓይ ሰዓር እትገብእ፣ ተብዕን፣ ቤጭ ወለመሽመሽ አሸያእ መ ናይ ብልዐት ለመድ ቡ። እብ ሻፍግ ለልዐቤ ሕማም ወክቡድ ሓለት ለልትሐመል፣ ዋዑም ወሕሩይ ለዘት ላቡቱ።


ካርፕ ዲብ ሰነት ዎሮ ሙውሰም ዲቡ ሌጠ ለልትፈሬ ጅንሰ ዓለ ዋዑም ማይቱ። ምነ ዲብ ዐድነ ለህለ ጅንሰ ካርፕ ኮርዋ ካርፕ፣ ሚሮር ካርፕ፣ ክሩሽያን ካርፕ ወገልድ ፊሽ ቱ።

ኮሞን ካርፕ ርቱብ ካምል ገሮቡ ለገልብብ ቅራፍ ለመልክ እትገብእ፣ ምን ብዕድ ጅንሰ ካርፕ ዲብ በነት ከንፈሩ ለዓሊት እበ ለቡቱ ክልኤ ንኣይሽ ሽክም ለመሰል ገሮብ እግል ልትፈረግ ቀድር። ሐቱ ኪሎ ለትትመዘን ካርፕ ኣስክ 100,000 ቤጭ ጸፊ።

እሊ እት ካምል ወጠነ ለልትረከብ ምን ሐቱ ኣስክ ሐምስ ኪሎ ልትሰጅል እትህለ፣ ለዲብ እዲነ ለዐበ እንዴ ትበህለ፣ ዲብ ሰጅል ክቱብ ለህለ ዲብ ፈረንሰ እት ሰነት 2013 ለትጸበጠ 45.5 ኪሎ ቱ።

ሚሮር ካርፕ
ምን ብዕድ ጅንሰ ካርፕ ለትፈንተ ቅራፍ ናይ እሊ ዓለ እምበል ንዙም ዲብ ክሉ ገሮቡ ፍንጡር ቱ።እብ ብዝሐ ዲብ አውሎታት ለህለ ከዛናት ንሹር ልትረከብ።

ክሩሽየ ካርፕ
መጅብ እት ክሉ ድዋራት እዲነ ለልትረከብ እትገብእ፣ ምግባይ ዐቦቱ 25 ሰንት መትር አው ሐቱ ኪሎ ገብእ እትህለ ዲብ ሰኒ ሓለት ላኪን ኣስክ 50 ሰንት መትር አው ሰለሰ ኪሎ እግል ልብጸሕ ቀድር። ክም



ኮሞን ካርፕ ሽክም ለመሰል ገሮብ ሰበት ኣለቡ ዲብ ደሀብ ደሀቢ ሕብር ነትል ወእብ ቀላል እብ ዕን እግል ትርኣዩ ወትፈንትዩ ትቀድር። ምን ማይ ክም ፈግረ ለጸንሐ ብዝሐ ደቃይቅ ሰኒ ሐድ፣ ወበራደት ናይ መትሐማል መቅደረት፣ ረይም ሰዖታት ሰፍረ ናይ መትሐማል ፍንቱይ ክም ወድዩ በሕሰን ሽርሐ።

ጎልድ ፊሽ
እብ ብዝሐ ዲብ ኣኳርዩም ክም መትገራረሚ ለልትርኢ ሕብር ቀይሕ ለቡ ናይ ዋዑም ማይ ዓለ እትገብእ፣ ዲብ ቀዲመት ቻይነ ክም ዳቀለ ወዲብ ክለ እዲነ ክም ትነሸረ ልትአመር። ቻይንይን ለትፈናተ ጅንሰ ካርፕ እንዴ

አደቀለው ኣሰፈር፣ ብርቱቋሊ፣ ቀይሕ ወጸለም ዓለታት እንዴ አትፋረው ልትመወኖ ክም ዐለው፣ እብሊ እብ ሐድ ዲብ እት አውላት ለህለ ከዛናት ወአሸራም ለልትረከብ ጎልድ ፊሽ ዝያድ ሕሩይ ወፍቱይ ክም ዐለ ሰጅል ታሪክ ለኣርኤ።

እት ኣኳርዩማት ለነብር ጎልድ ፊሽ ንኣይሽ ምንመቱ ዲብ ሰኒ ግሩም ከዛናት ላኪን ኣስክ 36 ሰንት መትር እግል ልብጸሕ ቀድር። ብዝሐሁ ክመ ለትሐዜ ምንመ ኢኮን፣ ድራሳት እንዴ ገብእ ዲቡ እብ ሐርሰ ማይ እግል ልትፋሬ ትቀደረ ምንገብእ፣ ዲብ መትጋረሚ ወሰዖሐት ዐቢ ዶር እግል ለኣግዴ ቀድር።

ዓዳት ቅራኦት ወሸባብ

ሸባብ

ዶ/ር ዑመር ዑስማን




“ቅራኦት እግል ኦሮ ነፈር ታምም ትወድዩ” ለልብል በህል ሀለ። ክም ነፈር እግል ተህሌ ወነፍሱከ ትጠውር ለመድ ቅራኦት ምህም ክምቱ እግል ሐበሮት ቱ ክምሰልሁ ለትብህለ። ክም እት ኦርእስከ ሕቡር ለህለ ፍንጌ ቅራኦት ወዓዳት ቅራኦት ፈርግ ሀለ። ሰበቡ እትለ እት ክል ምዕል ለልትቃዩር ሐብሬ ወትተክንሎጂ ለትመለኦት እድንዩ፡ እብ ንዙም/ርቱብ ድራሰት እንዴ ትለቀንከ፡ አግቡይ ቅራኦትከ ወክታብትከ አመሮት ወአትሳናይ ምህም ወላዝም ጋብእ ልትረከብ።

እሊ እትለ ሐልፈ ወቅት ሰበት ኢክትብ ወኢቀርእ ጃህል/ቃዊ ልትብህል ለዐለ እት ናይ ዮም ወቅት ኣካን ኣለቡ። እትሊ ወቅት እሊ ቅዊን አው ጀህል እት ሰለኦስ ደረጀት ልትከፈል።

አወላይት ደረጀት ቅዊን እግል ትቅረእ ወትክተብ ኢቀዳር ተ።

ወጠወሮት ዓዳት ቅራኦት ክም ምህም ኣሳስ ሐያት ሸባብ እግል ንርኣዮ ለኣስትህል።

ለቀርእ ክል ዶል ሐዲስ ሓጃት ደርስ ወናይ ረዩም ወቅሩም ዕልም ከሰብ። በሰር፡ ምህንት ወአምር እብ ቅራኦት ሰበት ልትሐላለፍ፡ አምርነ ወወዐይነ እግል ለፈሕ ወቁሪነ ለህለ እሉ ለመድ ቅራኦት ጠወሮት ምህም ቱ። እትሊ ዘመን ዐውለመት ዓዳት ቅራኦት ኢህለዮት ለለኣትሻቅል ወለለኣትአሰፍ ቱ። እለ ሸቀላት እለ እግል እት ገበይ ተጠውር ለህለዮ ድወል ሌጠ እንዴ ኢገብእ እግል ለጠወረዮ ድወልመ ሱድፈን ሀለ። ሰበቡ ውሮ ሸዐብ እት ለህለዮ ደረጀት ተጠውር ለህሌ፡ እግል ልቅረእ ኢቀድረ ምን ገብእ መቅደረቱ ትደህር ወምን ዓዳቱ ወነባሪሁ እግል ተአሪሙ ቀሊል ቱ። ምን ዓዳቱ ወነባሪሁ ለሬመ ገበል ህዩ ክም ምራድከ



ለካልኣይ ደረጀት ቅዊን ህዩ ሕሩፋት እት ተአምር ቅድረት ቅራኦት ወክታብት ኢህለዮት ቱ። ለሳልሳይ ደረጀት ህዩ ቅራኦት ወክታብት እት ቀድር፡ እብ ትሉሉይ እግል ትቅረእ ኢቀዳር (ዓዳት ቅራኦት ኢህለዮት) ወቀድረትከ ኢዓበዮት ቱ። እሊ ላሳልሳይ እትለ ሐዘካሁ ወቅት ወክም ምዛጃክ ቀርእ እንዴ ኢገብእ፡ ዓዳት ቅራኦት ሀለዮት ወተክኦጂ እሊ ወቅት እብ መትነፈዖት ወመሊክ ለትቀረኡ ክትብ ሐሪ ከምክም።

ክእኒ ሰበት ገበእ ቅራኦት ወዓዳት ቅራኦት ፈርጉ ኦርድ ወሰማ ቱ። እትለ ክል ምዕል ወሳዕት ትትቀዩር ለህሌት እድንዩ ምሰል ወቅት አምርከ፡ ቅድረትከ፡ ወዐይከ ወፈህምከ እግል ተኣትሳኒ እብ ትሉሉይ ሐቆ ኢቀረእከ፡ እት ሐያትከ ብዙሕ ለተርፈከ ሓጃት ህለ ባህለት ቱ። ሰበቡ ህለዮት ወተጠውር ወድ አዳም ምሰል ዕልም ቱ ለልትጸብዮ። ለገበይ ኣሰክ ዕልም ህዩ ትክፈእ ወትገርም ቅራኦት ቱ። ክም ሸባብ ህዩ ሐዲስ ሐብሬ ወአምር እግል ረከብ፡ ቅድረትከ ወምህንትን እግል ወሰኮት

እግል ትሰውጉ መረ ቀሊል ገብእ። እብ ፍንቱይ ሕነ ሸባብ በደል እት ቅራኦት እት ናይ ኤለክትሮኒካዊ መትፋግዖ አንተብሆትን ምሮ ምን ሰበብ ድሀር ለመድ ቅረኣት ቱ። ለመድ ቅራኦት ትሩድ ካድም ለኣትሐዘ እሊ ህዩ ምን ነፍሱከ እግል ልትበግስ ቡ። በህለት ምራድከ አመሮት ወለትፈትዮም ክትብ እግል ትሕሬ ቅዳር ለኣትሐዘ።

ተርጀመት ወአህምዮት ቅራኦት

ቅራኦት ለሚድ እት ድራሰት ልግባእመ ሐቆሁ እት ሸቅል ቅድረትከ እት ጠወሮት ወመትዐዋት ምህም ናይ ሕበር ሴምያይ ቱ። ቅራኦት እት ድራሰት ወሸቅል ዕዉት ወመትጃግራይ እግል ግብኣት ሌጠ ኢትን ለለኣትሐዘ። ለቀርእ ነፈር እብ ሰበት ደዋይሐ ወእድንዩ ካሬ ሐብሬ ሰበት ቡ፡ ምን ለኢቀርእ ነፈር ዝያድ ፈህም ቡ። እሊ ህዩ እት ለለኣትሐዘ ወቅት ምህም ከጥዋት እት ንሰኣት ሰዴ። መንበሮክ እግል ኣትሳናይ ወእትለ ትብበገሰከ እቱ መጃል ትትዐወትመ ተረቱ ዐባይ ተ።

እሊ እት ለዐል ለሰሚናሁ እግል

ኦሮ ነፈር ቱ። እግል ምጅተመዕ እብ ተማሙ ለህለ አህምዮት ህዩ ዝይድ እሊ ቱ። እግልሚ ምን እንብል፡ ምሮ ገበል እንዴ ቀርኣ ታሪኩ ወታሪክ ጄራት ድወል ወዐለም እግል ለአምር ለአቀድሩ። ታኦሪክ አመሮት ህዩ ኣዘ ምን ገብእ ወእት ምስተቅበል ሚ እግል ተውዴ ብከ እግል አመሮት ለአቀድረከ። ስትራተጂ ወኣሰሉ (ታክቲክ) እግል አፍገሮትመ በደለ ኣለቡ። ክል እት ቀበት ምጅተመዕ ለህለ ቁድራይ ምህንት ዶል ቀርእ ወእብ ትሉሉይ ልጠወር፡ ተጠውርለ ምጅተመዕ ኣኪድ ወራቴዕ ቱ። ምህንትን እግል ጠወሮት፡ እኪት ወሰኔት እግል ፈንተዮት፡ ከሃሎ ጠወሮት፡ አህምዮት ዓኢለት አመሮት፡ ወእግል ዋልዴንከ፡ ውላድከ ወእት አጠራፍከ ለህለው እብ ሻም ወረሕመት አመሮት እግል ትጽብዮ ለአቀድረኣከ።

“ ቅራኦት መትት ምክ ቱ” ለልብል በህል፡ ምክን/ፍክርነ እብ ትሉሉይ እብ ቅርኣት አምር ወሐብሬ ህቆ ኢመወናሁ ክም ነፍሱን ለክብረ ህቆ ኢረክበት ለተዐብር፡ ተህምር ወዐጸቦ ለሳድፈ፡ ምክናመ ሐቆ መትት ኢረክበ፡ ልትጸምሌ፡ ወእት ረኣሰ ጋራት ለህለ እነ ረኣይ ሸሉል ወምን አማን ለሬመ ገብእ። ናይ መዘክር፡ ሰኒ ሐሰብ ወትሩድ ቀድያት ባልሐት ቅድረትን ምሰል ትሉሉይ ቅራኦት ልትጸብዮ። ሰበት እሊ ቅራኦት ፈህምን ወርእዮትን እት ዓበዮት ወምን ሐጫር እት ናይ እድንያይት ርእዮት ለዐዴ። ቅራኦት መቅደረት ዓቅልዮት፡ ምህዘት ወቁሪነ ለቡ ፈህም መትነፈዖት እግል ለህሌ እነ ሰዴ።

እብ ከኣፎ ለመድ ቅራኦት እንጠውር?

ቅራኦት ኣክል እሊ ምህም ሐቆ ገብኣ፡ እብ ከኣፎ ለመድ ቅራኦት እንጠውር ኣክልሕድ ክምሰልህ አግደ ቱ። ቅራኦት ምሰል ለመድ ወታጃራብ ለቦም አንፋር መትሃጃክ በህለት ቱ። እብ ገበይ ኣክትብዮም እንዴ ወዴክ እግል እሎም እት ለትፈናተ ዘመናት ለዐለው እብ ሐያቶም ምን ለዐሉ እግል ሐቴመ ሳዓት ምሰሎም እግል ትትሃጀክ ለኣላፍ እግል ትትደፊዕ ለትቀድር እብ ገበይ ኣክትብዮም እንዴ ወዴክ ክም ምራድከ ወእትለ ሐዘካሁ ወቅት ትትሃጀክ ምሰሎም



ወተጃራቦም ወፈህምም ትትመወን።

ሰሮም ክትብ እግል ትእበዮም ትቀድር ወየምክን ጽበጦም እግል ልረይሐከ ኢቀድር፡ ሰበት እሊ ምኖመ ዕልም ምን ኢትከሰብ ምን ህቶም ለክልጠው ኣክላጥ እግል ትደገግ ሰዴከ። ቅራኦት ህዩ ዓባዩ ክትብ ሌጠ እንዴ ኢገብእ ምን መጀላት፡ ጀራይድ፡ ብሮሽራት ወለትፈናተ ለልትቀረእ ሓጃት እግል ልትረከብ ክም ቀድር ኢመትረሰዮት።

ጀራይድ ወመጀላት ሐድ አግጸት ወምህም ሐብሬ ሰበት ልትረከብ እቱ፡ ክም መኣንብታይ እቦም አንበቶት ብዙሕ ሴድያይ ቱ። ለመድ ቅራኦት እት መባዴሕ ወረኣይ ናይ አንፋር እምበል፡ እት ደረጀት ተጃረት ወደረጀት አምር፡ ደራሴ ዕልም ኢለኣተንክብ። ለመድ ቅራኦት እግል ሸባብ እብ ፍንቱይ ወገበል እብ ዕመማይ ህዩ ምህም ሰበት ገብኣ፡ ምን እሊ እንዴ ኣትሌነ ዓዳት ወለመድ ቅራኦት እግል ጠወሮት ለሰዴ ንቃጥ እግል ንርኤ ቱ።

እት ጀፈርከ ክታብ ከሪ አውመ እትለ ትሳፍር እቱ ወቅት ክታብ ሐቆ ምሰልከ ነሰኣከ ምን ተሐምቅ ሐቴ ገጽ እግል ትቅረእ ለአቀድረከ።

እትሊ ወቅት እሊ ልሙዳም ጋብኣም ለህለው ክም ከሪ ፍልምታት፡ ኮሚዲታት፡ ሐልዮት ወብዕድ ናይ ሚመዮት ወቅርኣት ቅድረትን እት ደህሮት ተረቶም ዐባይ ተ፤ ሰበት እሊ እግል ኢነኣብዝሐም ወኢንትወለፎም ንትሓፈዝ።

ቅራኦት እግል ክሎም ስምዒታትን አውሽዑርነ ወሴላትን

ክም ልትሐረኮ፤ ሸቁ ወለሐሰቦ ሰበት ወዱ ምለዐል ናይ ኤለክትሮኒክስ መትፋግዒ እት ዓበዮት ምህንትን ወነሻጣትን ምህም ቱ። ፍልም አው ተለፍዝዮን ኢትርኤ እንዴ ኢገብእ ናይ ቅራኦት ወቅትከ ለነሰኣ አው ናይ ቅራኦት መቅደረትከ ለለኣትሐውኖ እግል ልግበኣ ኣለቦም።

ዮም ምሰል ተጠውር ተክኔሎጂ እብ ብዕድ ህግያታት ለዳለው ክትብ እት ህግያክ እንዴ ቀዩርከ እብ ክርን እግል ትሰመዕ ለትቀድር እቱ ወቅት እብ ግብኣቱ፡ እሊ ለመድ ብንዩት፡ ዓዳት ቅራኦት እት ጠወሮት ተረቱ ዐባይ ተ። እግል ሚ እሎም እብ አውድዮ/ክርን ለሰመዕነሆም ክትብ ሐር እግል ትቅረኣም ለለኣትናይቶ ሰበት ገበኣው።

ምለዐል ክሉ ላኪን ለመድ ቅራኦት ለቦም አንፋር መልህያም እግል ለህሉ እከ ለኣስትህል። ሀለዮቶም አግዳ ቱ። እት እንተ ለትትኣየስ እቱ መጃል ክምሰልከ ለልትኣይዕ አንፋር እብ ፈተሾት መጅመዐት/ክለብ ቅራኦት እግል ተኣስተብዱ ትቀድር። እሊ እት ረኣሰ እግል ትቅረእ ለለኣትናይቱ፡ እትለ ቀርኣኩሙ ክትብ ለትፈናተ አራኡ፡ ፍክር ወገብይ ርእዮት እግል አምጸኣት ሰዴ።

ብዕድመ እት መካትብ ቅራኦት ጌሰት ብዙሕ ለኢተአምሩ ክትብ እግል ትርኤ ወትርክብ ሌጠ ለሰዴ እንዴ ኢገብእ ምሰል ዓዳት ቅራኦት ለቦም አንፋር እግል ትትኣመርመ ለአቀድር።

እት ክል ምዕል ምን ልውሕድ ሐቴ ሳዕት እግል ቅራኦት ፈንቱ። እት ሰፈር፡ እት ኣካን መዋዕድ አዳም እት ትጸበር፡ ቀደም ሰኪብከ፡ ምን ሰኪብ ክም ቀንጽከ ወለመሰሉ አውቃት እግል ትቅረእ ትቀድር። ሰበት እሊ ክል ዶል ረኣሰከ እግል ቅራኦት አዳለዩ እምበል ላዝል እትለ ሳዕት እለ እግል እቅረእ ቱ ምንመ ኢትብል ደሐን ቱ።

ሰበቡ ዕለመእ እድንዩ ምስጢር እድንዩ እግል ተአምር እት ክል ኣካን እግል ትቅረእ ቀዳር ምህምቱ ወምስጢር ዐውቴሆም ህቱ ክምቱ ሰበት ሸረሐ።

ናፈላቱ ክም እለ እት ልብል ህግያሁ አተላለ።

- ላመ በክትዬ እንዴ ሰነ ዲብለ ሸቅለ ፈን ዐባይ ዐውቱ ራክብ ህሌኮ። አሰይድ ፋሊ ዲብለ ሐፍለትለ ከብቴሁ ዐዝሚኒ። ወገሌ ምነ ሰወርዬ ለዐውለን ሐድ ዐስር ግጥዐት ናይ ደሀብ ትሰመ። ምናተ እግል አዝብዮን ይሐዘኩ፣ እንከ እለ ሱራቲት ኒኢሽ ረአየ!

ደደፍ ለልቡ ምነ ታውሰ እቱ ለዐለ ሕሳባት አስክለ ሐሁ መጥዩቱ ለዐለ ጋር በልሰዩ። ሱራት ንኢሽ ናይ ሐረስታይት ሸንብሬብት እተ ወቅትለ አመቃርብ ዲብለ ግንራራብለ ኒል እት ትበጥር ወለ ሰመ ምለዐሌህ እበ ቀይሕ ሕብርለ ጸሓይ ናይለ እዋን አመቃርብ ግልብብት እት እንተ ተአርኤ ዐለት። ግርመትለ ሱራት ልቡ ለሰልበቱ እት መስል ምነ ዐለ ዲቡ ሕልም እንዴ ሀረሰቱ ከእንዴ ኢልትአመሩ እግል ዓፊህ እት መሳፈት ሰኒ ሐጫር ቀርቦ ምነ። ናፈ ሰኒ ክም ዐጅብቱ ዶል አመረ ምን ቅያሰ ወለዐል ፈርሐት ወረቱ ወክም እለ ቤለ።

- ትርእየ ህሌከ ለሱራት። ለሓባር ለሀለ ዲቦ አማንዬቱ ማሚ? ለኒል አቅምት ወለ ሐረስለ ሰመ ረኤ!
ደደፍ ህዬ እብ ክርን ሔልማይ ክም እለ ቤለ።
- ጽንሕ ምንዬ እንታዲ እለ ሐረስታይት እለ እግል ዕፌቱ፣
ናፈ ህዬ ለሱራቱ ልትፋጠን እንዴ ዐለ ክም እለ ቤለ።

- ለሪሸት እግለ ሕቡናም መላዊት ወለ ለሚምለ ኒል ተማም ዋሰፊቱም ህሌት፣
ደደፍ ህዬ እግለ ህግያለ ፈናን ብዙሕ ባል እንዴ ኢለሀይቦ ክም እለ ቤለ።
- የሀው እለ አልሀት፣ ገርብ ራዊ፣ ግሩም መማኒት፣ ጀለ ጀላለ ለአልሀት። ወለብጥረተ ታክየት እምበል ዐርኮካባይ ሻንን ሐቴመ ኢትመስል!
- ለጀራዲን ወለግረህ እተ ሕግስለ አድብር ለሀለ አቅምት። ለመድረዋራቱ ሚ ሸርሕ?
ደደፍ ህግያለ መለሀዩ ሳምዐ ክም ኢሀለ እት መስል ክም እለ ቤለ።
- አናዲ ወሰፍ ሰአንኮ እለ እለ ግርመት። ለገርብ ሕብር ተመር ወለ ገጽ በርሀት ወርሕ፣
- ውልዋል ግብለት ለአሸር እግልከ፣

- እለን ዕንቱታት ጸላይም ለግርመተን በታተን ኢትትወሰፍ፣ መላእክት ተአቀምተክ ለህሌት ሌጠ ትመስል እትከ፣
- ለውቀት እብ በይነ ሌጠ ኢኮን ዲብለ ሱራት ለህሌት። ዲብለ ሐረስለ ሰመ ለሀለ

ተመህ ቀደር



ቅይሐናለ አመቃርብ ረኤ። እሉ እግል እርሰም ወለናይ አማን ሕብሩ እግል ሀቡ ለወዳኮሁ መጅሁድ እምበል አልሀት አሮትመ እግል ልድለዩ ኢቀድር፣
ደደፍ እንዴ አቅመተዩ ከሰኒ ፋይግ ወእዩሰ እት እንቱ ክም እለ ቤለ።

- ናፈ፣ ለሱራት ርሕ ብዲቡ። ተሀተማትም እት ህሌት እሰመዐ ለህሌት መስል ዲብዬ ሀለ .. እንተ ወሀተ ምስል እት ሐቴ ቤት እት እንቱም እብ ከአፎ ትነበር ምስለ ህሌከ?

እብ ፈርሐት ለእደዩ ዲብ አሕድ እንዴ ዳከከ ከክም እለ ቤለ።
- ዐስር ግጥዐት ናይ ደሀብ ምን ሰመወ ጠላቀ እሎም አቤኮ፣
- እለ ሱራት ኩሉ-ኩሉ ኢተአዝብዮ፣

- እግል ሚ?
- እለ ሱራት እለ ናዬተ። ጀላባ ወለ ርሕዬመ ይእጠምዕ፣
ናፈ እንዴ ትሰሐቀ ክም እለ ቤለ።

- አለ ዕምር ዐስር ሰቡዕ! እንቲ ክመ እሳት ለትልዔ። ወለሃባተ ደለ ቀርቦዩ ቃምድ እንቲ። እንቲ ዲብለ እበን ወለ ማይ ወለ ሓባር ሐዮት ወረሕመት ትዘርኢ፣ እንቲ አውሃም ወከያላት ትፈቲ። ወለሓላም አማን መስል እትኪ ወእግለ ወልኪ ዲብ ዐዛብ አልጀሐም ትቃሚዱ!

ገጽለ መንደላይ ደም ሰበት ፈልሐ ዲቡ ምነ ህግዩ በጥረ። ናፈ ህዬ ለሐሩቀቱ ምን ረኡ አርሐመዩ ከክም እለ ቤለ።

- እንተ ጁንዲ አብሸርከ፣
ደደፍ ህዬ እት ልትረጀዩ ክም እለ ቤለ።

- እለ ሱራት እዴክ ኢተአጠልቀ፣

ናፈ ብጣሩ እንዴ ገብአ አስክለ ሱራት ረትዐ። ከምነ አካነ እንዴ ሀረሰዩ ወክም እለ እት ልብል እግለ ሐሁ ሀበዩ።

- እንካተ እግልከ ሃይቦ ህሌኮ፣
ደደፍ ልቡ ጸብጥ ክም ሀለ

እት መስል እብ ምልሃሁ ዲብለ ሕቅፋ እንዴ ከረዩ። እብ ክርን ሃድአት።

- ናፈ ሐምዴዬ ትብጸሐከ!
ናፈ መብሰጥ እት እንቱ እተ ምግሳዩ አቅበለ። ደደፍ ላቱ እበ ብጣሩ እት እንቱ ክም ዕጫይ ዩብሰ .. ወኩሉ ቀልቡ እት መትፈካርለ ሐረስታይት ካርሁ እንዴ ዐለ ክም እለ ቤለ።

- ምንኮር! እለ ሸቅለ ከዶል ዐደድ እለ ለአትፈክር?
ናፈ ህዬ እብ ምልሃሁ ክም እለ ቤለ።
- ኢፋላ። እለ ናይ ከዶል ሱራት ኢኮን፣

ልብለ መንደላይ ምነ ክርሲሁ እንዴ ወድቀ እት ልትረጃ ትሰአለዩ።

- ከአዜ በህለትክ ለበዐልተ ሕያይት እት እንተ ትነበር ህሌት ትብለኒ ህሌከ?
- ዐቢ እለ፣
- ከህተ .. ከህተ አክል አሕድ ክም እለ ሱራታተ፣
- አላሁ የዕለም ምነ ወለዐልመ ትገርም ትገብእ፣
- ናፈ!

ለፈናን ተበሰም ውድ። ለመንደላይ ለልቡ ስሉብ ዐለ ህዬ ትሰአለዩ።

- እንተ ተአም'ረ?
- ዲብለ ግንራራብለ ኒል እግል ክም መረት ርኢህ ህሌኮ፣
- እት እሱወ አካን፣
- እብ አንክር ቅብለት መነፍ፣
- ህተ ዲቡ ክል ዶል ትገይሱ፣
- አውቃትለ ማሲለ ምድር ህተ ወመሳኒተ ዲቡ ገይሰ ከዲቡ ልተልሀዩ ወልትሃጅክ ወጸሐይ ትከፊት ምን ገብእ ለዐይረ .. አነ ምረሐረ ዕጩትለ ዕልዲቦት እንዴ ተሐበዐኮ ለምጽአተን እብ ሰብር እት ጸበረ ዐልኮ!

- ከህተን ክል ዶል መጸአ?
- ኢተአትሐሴ። አነ አምዕል ለሱራጅ አክለሰኩተ ሐቀህ በጠርኮ ምነን፣

ግንሐት በዐል ሸክ እት ገንሐ ወዲብ ፈርህ ትሰአለዩ።

- እብ ከአፎ ገበይ እግል ትርሰመ ቀደርከ?

- አነ እለ ግርመት እለ ዐብ'ደ እት ኢኮን ይእፈትዮ፣

ደደፍ እግለ ህግያሁ ብዙሕ ባል እንዴ ኢለሀይቦ ትሰአለዩ።

- አክል አሕድ እት እሱወ ባክ ትርእየ ዐልከ?

- መዕበድ አቢሰ እበ አንክረ ቅብለቱ፣

- ዲብለ ባክ ለሀይ አስክ እለ ትመጽእ ተሀሌ መስለከ?

ተበሰም

• ጀማይዕ ውሕር እግል ሰፈር ሕድ ታላ። ሐር ክለ ወቅት ነብረ ተማተ ምርቶም ከግጥዐት ሰገ እግል ልትዛቦ አተፈቀወ። ለሰገ እት ምርት ከልዕ ምስል ለአበሹሉ ሰበት ዐለው ምርቶም ተ ከዲብለ ናዩ ግድ ለአሰር እቱ ወእግለ ግድ እበ ጠረፉ ጸብጡ ዐለ። ከለ ከልዕ ማይ ወዱ እቱ ወተክወ ወለ ሰገ ምስል በሸል። ከዶል ለሰገ በሸላተ ምርቶም ተ ከልግዱ እሉ ልስሕብ ወዲቡ እሱር ለዐለ እብ በይነ በለዐ። ወለ መረቅ ህዬ ምስል ልትሓዎሉ ዐለው።



ኑተ ሰፍ ርሕክ ምክር

ምርት መልክ ምድር ሰኒ ፋይሕ ለለሐክም ነብረ። ለመልክ ሐቴ ምዕል እለ መምለኩቱ እብ እገሩ እግል ሊዙረ ቀረረ። ሐቅ ዕቅባለቱ እብ ሰብብለ እሉ ጌሰ እኩይ አግቡይ ለእገሩ ተሓበጠ ወጸልዐ። እብለ ሰብብ ክለን ሸዋርዕለ መዲነት እብ ቀርቦት እግል ልትገልበበ ለጠልብ አዋጅ አፍገረ። ምናተ ምርት ምን ሰብ ሾረቱ ለሔሰ ርኢይ ደግመ እለ። ህቱ ህዬ ሕኔት ሸዋሬዕለ መዲነት እብ ምልኡ እብ ቅራብ ልትገልበብ፣ ግጥዐት ቀርቦት ንኢሽ እት ሐንለ እግርለ መልክ ምን ትገብእ ለሐይሰ ቤለ። ወምንለ አምዕል ለሃቱ እስኢን ለተአመረት።

“ከዲብ እለ እዲነ ልወቅ እት እንተ እግል ትንበር ዶል ሐዘከ። እዲነ እብ ግዲደ እግል ትበድል ኢትጃርብ። እት ሰልፍ ነፍሰክ እግል ትበድል ትጸገም። ሐቀህ እብ ክሱሰ እት እዲነ ለጀሬ መትብዳል ሕሰብ”።



ነፌሳ ወድ ዕትማን

እብ እም-አራዊቶ ልትበህል ለነብረ

ሱብ በዲር፡ ክም እሊ ናይ
ዮም ዕድዳት ብዞሕ እግሎም
ሰበት ይወላ፡ ምነ እት አዋራፎም
ለህለ አቀዋፍ ልግበእ ወሐዋናት
ልትዳወው ነብረው። ከእም-
አራዊቶም ልትዳወው ምነ ክም
ዐለው፡ ዲበ ከረ ነፌሳ ወድ
ዕትማን ወኢኖ ወድ ሊትማን
ለጠብዐዉ ክታብ አድጋማት ሱብ
ትግራ፡ እም አራዊቶ እብ እምነት
ሸዐብ ገሌ ሰራይ ልትረከብ ምነ
ክም ዐለ ክቱብ ህለ።

ስም እም-አራዊቶ (ሕ'መት)

ምን እም-አራዊቶ ገሌ ሰራይ
ልትረከብ፡ ህቱ ክል-ዶል ሕብረ
ትብዳድል። ሕማም መርዘም
ለረክዩ አዳም እንዴ ትገሰ ብላዩ
ልትገልበብ ወእግለ እም-አራዊቶ
እንዴ ጸብጠወ እቱ ረአሱ ከርወ
እሉ። ለእም-አራዊቶ እብ ረአሱለ
ብላይ ዲብ ትለምም ዲቡ ሕብረ
እት በዳድል ትትሐረክ። አዳም
በዲር ክም እለ ሕብረ እት
በዳድል ወትለምም ክም ልርእው፡
እግለ ሕሙሞም “ዕድርለ ረአሱ
ነሰአት ምኑ ከጌሰት - ክላሰ ሐዩ”
ልብሎ ከሐር ከርወ ምኑ። እብ
ክእነ ህዩ ለመርዘም ለሐድጉ
ልብሎ ከልአምኖ ነብረው።

ላኪን እም-አራዊቶ ሕምዝ በ
ወለሕምዝ ሕ'መት ልቡሉ። እለ
እም-አራዊቶ ምስል ቀጠፍ ሕብረ
አክደር ዶል ትብድሉ፡ እንሰ ሰዐር
ትመሰል ዲበ ክትበልዐ። ወእለ
ለበልዐ ገመል ልግበእ ወነአት
መይት እቡ። ወእብሊ ሕምዝ
እም-አራዊቶ ለትመይት እንሰ፡
“ሕ'መት በልዐት ከሞተት”
ትትበህል።

ከእም-አራዊቶ፡ ደወ እንዴ
ኢትገብእ፡ ሕማም ተአመጽእ።
ሰደፍ መርዘሙ ለሐድገቱ
ነፈር፡ “እም-አራዊቶ ለመት
እቱ ከሐዩ” እግል ቲበሉ ሰዱድ
ቲ። ላኪን እትሊ ወክድ ጎነ
ምን ሕምዝ አረዊት ለልትሸቂ
አሰርየት ዘበናይ ሰበት ህለ፡ እም-
አራዊቶም የምክን አምዕል ሐቲ

ዓዳትነ ነአምር

ነፌሳ ወድ ዕትማን ወኢኖ ሊትማን እብ ክሱስ ሐልየት፡ ዓዳት ወአድጋ ትግራይት እቱ ወደዉ
በሐስ ወድራሳት፡ ክምሰልሁመ እት ደረጀት ሞባዐት ለአብጸሐው፡ ከዮም ክብት ትግራይት እግል
አጅያል ለሐዲስ ጋብእ ለህለ አክትበት፡ እግለ መጽእ አጅያል መትሃግየት ትግራይት ዝሕረት ዐባይ
ቲ። ነፌሳ ወድ ዕትማን ወኢኖ ሊትማን ህዩ ዲብ ተአሪክ፡ ዓዳትነ ወሕላይነ ለአግደዉ ዶር እብ ቀሊል
ለልትረኡ ኢኮን። ከሰፍሐት ፈን ወግዳት እሊ እት አክትበት በዲር ለህለ ርዝቅ ህግያነ ክሉ አዳም ጀላብ
እግል ልርከቡ፡ ለአምሩ ወልትነፌሳ እቡ፡ እትሊ ዓሙድ እሊ ምነ ብዞሕ ጽበዋለ አክትበት ዲብ ነሐሬ
እንቀድም እኩም ህሌ። ከእግል ዮም'መ ምን እሊ አክትበት እሊ ለአዳሌናሁ ጽበዋ ጀበእ እምለኩም፡
ክቅራአት በኪተት።

ሕ'መተ ደወ እንዴ ትሸቂት
እንርእዩ እንገብእ ከእሊ ብሂል
ገቢልነ አማን ለአሰቤሕ!

ድግም ሕዋይ ለልትበህል አርቂ

ምን አራዊት፡ ሕዋይ
ለልትበህል አርቂ (ከይሰ) ህለ።
ሕዋይ ሕብሩ ጸዐደ ወዕንታቱ
ገዛይፍ ቲ። ከእሊ ሕዋይ
እግል አዳም ልግበእ መ ሐዋን
ብዕድ እብ ሕውራረት ቀትሉ
ልብሎ። ላኪን ለሕዋይ በል
እንዴ ኢለአብል እቱ ለአዳም
ሰልፍ ረአዉ ወሐብሬሁ ረክበው
ከሰከው ምን ገብእ ልድሕኖ።
ላኪን እሰልፍ ህቱ እንዴ በድረ
ገንሐዮም ምን ገብእ፡ ለአዳም
ምን ገብእ ወለሕያይት ብዕደት
እቱ አካነ ተርፍ ከትመይት
ልትበህል ነብረ። ምናተ፡ ሕዋይ
ብዞሕ አውካድ ኢልትረኡ። እት
ዘበን በዲር ግሌ እብ ግንሐቱ
ለሞተው ዐለው ልብሎ።

መደት ሐቲ ሕዋይ ምን ዓለ
ማይ ሰተ። እቱ አሰሩ ህዩ ሱብ
ሐ ወርደው ከምነ ዓለ እግለ
ሓሆም እት ሰማይት ገለው።
ለሐ ሕድገትለ ሰልፈ ለማይ
ምነ ሰሙይ ክም ጠዐለት እቱ
አካነ ተነቅል ገብአት ከትማየተት
ዲቦም።

ለሱብሊ አሐ ወለተለች ህዩ
እበ ተርፈት እሎም አሓሆም
ዓለ ብዕደት ወርደው ከምነ
አሰተው። ወእግለ ዓለ ለሓሆም
ጀልፈት፡ “ዓለ ሕዋይ” ሰመወ
ልብሎ። ላኪን ህቶም እግለ
ሕዋይ ኢረአው፡ እብ ህቱ ገብእ
ቱ ለትሃገው። ወምነ ወክድ
ለህይ አዳም ዶል ረግም “ሕዋይ
ሱቲ” ልብል። እምበልሁመ እግለ
በዐል ሱሰት ላቱ አዳም፡ “ገጹ
ሕዋይ ቱ -ኢልትረዴ” ልቡሉ።

ከምን እለ ድግም “ሕዋይ”
ሰሚት አርቂ ዲብ ገብእ፡
ለምራቁመ ሕዋይ ልትበህል
ወሰሙም ቲ። ከሎም ሕያዩም
ህዩ ቀትል። ከምን እሊ ድቁም
ሰሙ እንዴ ትበገሰ ገቢል ትግራ፡
“ሕዋይ እብ ሕውራረቱመ
ቀትል” ለትብል ክላሰት በጽሐው
ከእባቱ ፈርህዉ ነብረው።



ኢኖ ሊትማን

ምን ሕላይ ቀዳምያም

ዲበ እት ሰነት 1913 ለጠበዐ ክታብ ሐይለት ትግራይት ዝያድ 800 ለትፈናተ ሐልየት እብ ለትፈናተው
ሐልየት ክቱብ ህለ። ከእንዴ አትሌነ እለ መሐመድ ዐሊ ወድ ፋላት ምን ሐባብ ዐድ ህብቲሱ፡ ከንቴባይ ጃውጅ
ክምሰል ሞተ ለቤለዩ ሕላየት እግል ንርኡ።


ማሌ ፈግረ ቤሉነ - ምን ደከኖ ወሰምሀር
እግል ልንሰእ ሺመቱ - ንጋረቱ ወመንበር
እግል ለአፍርህ ወለአፍቱ - እብ መናዱቅ ወዐሽከር
ዮም ሞተ ቤሉነ - መሰእል እኩይ ኢለአቅብል
አባይከ አቅረደ - ትከረ ምኑ መሰገደል
ፈታይከ ቀርቀረ - ክሉፍ ህለ እብ ሐዘን
እትለ በዐልዩ መነዩ - ምን ሐይሰ አምበል ደሐን

አንኮለልነ ኢኮኒ - ከፎ ኒዴ ወንግበር
እሸዎ እሊ መንባና - ወለእሉ ንትከተል
በዲር አብ አምነ - ምን ክሉመ ልትቀተል
ጸሩ ጸረ ወጽሮም - ክቡድ ጸሩቱ ወጀደል
ጋሻይ ዐዱ አቅበለ - እንዶ ጌሰ ክል ከሰር
ወሐር አብመልከ - ገምየ ህመም መሸንገል
አብ-ገደቦ ሰካብ ሚቡ - አምበል ሰሀር
መሓዛት ለጅውጅ ደንኖ - ሰብኡ ልትወዴ ወልትገዐር
አድማይ ደንን ሳሳቱ - ሳክዮታቱ ልትፈንጠር

ስም መሰመም - እግል አባይ ልትበሸል
እት ሐሳስ በርበሬቱ - እት አሰርየት ኢልትከህል
እት ወሓይዝ አብደላምቱ - ለመሓዝ ዐቢ ልጸቅለል
ዐድ ሕድ በጽሕ አብ ሃክብ - ለከረም ምንዲ ትትህንደር
እት አራዊት ኮከባይቱ - ኢለአትፋኔ ልትአዘር
ጽፍሩ ጸብዋ ወእርግሁ - አቡሱሰ ለወነን
ኢህይቦ ቅታሉ - ኢሐድጎ እብ ደልደል
ግሎት በሌዕ እበኑ - ዐቅበ ናቅል ወሕመር
ከአዜ ሰኒ ወለድከ - ምንመ ትመይት ትትቀበር
እት ፈረዕ በደ ኢተሐሰብ - ጋንክ ልስከብ ኢልሰሀር

አባይኩም እበዎ - ለተአመሰሎ በዐል አከር
ፈታይኩም ፍተዎ - ለእት ገርብኩም ልትአመን
ማርሓይ ሰኒ አምርሐዎ - ሰኒ ሊበል ወልግበር
ታይላይ ሰኒ አትልዎ - ደረብኩም እግል ኢልደልደል
ትግራይ ሰኒ አምብሮ - ዲብኩም እግል ልትከተል
ኢትዝበጦ እብ ሞራ - ወኢተዐይሮ እብ ከንፈር
መቅሰናይ መርባት ብጎነ - ለላሊ ተርህ ዲብ አከር
አዜመ ስልጣን ብጎነ - ለሹም ግሱይ ረአሰ መንበር
አዜመ ጸጋይ ብጎነ - ለጋሾታቱ ልደረር
ለደፈአነ ብጎነ - ገድም ዲብ መን ንሰልፈለል





መትባድራይ በጀክት ሄኖክ መኩሽብርሃን፡ ዕውት ዱር ኩንጋይ-ኬን 2023

ኤረትሪ መትባድራይ ፈሪቅ ዐጀላት ኢጣልያ ግሪን ፕሮጀክት ባርዲያኒ ሄኖክ ሙሉ-አብርሃን የም 16 ጁላይ ዲብ ቻይን እተ ተ'መ ጀግረ ዱር ኩንጋይ-ኬን

ናይ ወቅት ወናይ ንቀጥ ለሐሰ መትባድራይ እንዴ ገብአ ዐውቱ ጃቀፈ። ወድ 23 ሰነት መትባድራይ ሄኖክ ሙሉ-አብርሃን እትሊ የም

ዓመት እግል 22ይት ኢኩቱ ለገአ ብድረ ዐጀላት እብ 31 ሳዕት፡ 14 ደቂቀት ወ 57 ካልኢት እንዴ አትመመ ህርድየት-ናይ ወቅት ፍሌንዩት ነስኦ።



ሄኖክ ዲብ ሰማን-መርሐለት እብ አክሊለዩ ናይ 75 ንቅጠት ጀመሩ፡ ሊናይት ናይ ንቃጥ-ፍሌንዩት ነስኦ። እለ ፍሌንዩት ፋርስ ሰጋይድ እግል ልንሰእ እተ ገብእ ዐለ ብድራመ ሄኖክ 3ይት ደረጃት ጸብጠ።

ናዲ ግሪን ፕሮጀክት ኢጣልያ፡ ሄኖክ እብ ጀምቦዩ እሉ ወቅት እንዴ ትሰደ 20 ለትፈናተ ፍረቅ እንዴ ቀልበ መዳልየት ደሀብ ነስኦ።

ሄኖክ ሰንበት ዐባይ እተ ገብአት ሳምናይት መርሐለት ፍሌንዩት ሊናይት እብ ንቃጥ እንዴ ለብሰ ልትባደር እት እሉ፡ ዲብ ናይ ወቅት ብድረ ህዩ ምን ወድ-ኡራጓይ ላቱ ኤሪክ አንቶንዮ እብ 3 ካልኢት እንዴ ደንገረ ብድራሁ አትመመ። ዲብ ደንገበ ክልኡ-ፍሌንዩት ሕሽመት



እግል ልንሰእ ሰበት ቀድረ ምን ለትፈናተዩ ጀሃት ሐምዴ ረክበ።

እትሊ ሰነት ጎነ ብሉተ ሻምፕዮን ጀግረ ዐጀላት አፍሪቀ፡ ክምሰልሁመ ዕውት ናይ ወቅት ብድረ ዱር ርዋንደ ለነስኦ ሄኖክ ሙሉ-አብርሃን፡ ዲብ እለ ናይ አዜ ጀግራሁ 200 ናይ ዩሲኦይ ንቅጠት ለአክሊል እት ህሉ፡ እብ ዓመት እትሊ ሖል ጎነ ዲብ ለትፈናተ ብድራታት እብ ሰጀለየ ዐውቱ ህዩ፡ 861.75 ናይ ዩሲኦይ ንቀጥ እግል ወጠኑ ሐየቡ። ሐቆ ናይ ዱር ኢጣልያ

ብድራሁ እንሰር እት ወጠኑ እንዴ አቅበለ እት ሻምፕዮን ብድረ ዐጀላት ኤረትሪያ መዳልየት-ነሐስ ለነስኦ ሄኖክ፡ እትሊ ሰነት ጎነ እብ እርኡየ ለህለ በቃዐት-ውቅል፡ ለትፈናተዩ እድንያይ ፍረቅ ጀግረ ዐጀላት ዐዙመት ቀድሞ ዲቡ ክም ህለው ልትሐበር ህሉ። ምስል እሊ ናይ ኢጣልያ ፈሪቅ ለፈረመዩ ውፋቅ እትሊ ሰነት ጎነ ሰበት ለአተምም ህዩ፡ ምነ መጽእ ምውሰም-ርያደት እንዴ አንበተ ምስል ዐባዩ-ነዋዲ እዲነ እግል ልትሐበር ክምቱ ለበጽሐነ ክበር ወዲሕ።

ፍረቅ ስኒት ወሰላም እንዴ ኢልትቀለቦ እት ካቲማ በጽሐው



ሻምፕዮን ካልኢይ ዲቪዝዮን ፕሊቦል አቅሊም ምግብ፡ ናይ አወላይት ደውረት ጀግራታቱ እንዴ አትመመ ዲብ ካልኢይት ደውረት ዕዱይ ህለ። እብ አሳሰለ ዲብ አወላይት ደውረት ምን ክልኢቱ ጀንሰ ለትረከበት ፍገሪት፡ ለምን አወላይ አስክ ዓስራይ ደረጃት ለጸብጠ ፍረቅ ቱ ዲብ ካልኢይት ደውረት ለትዋጅህው። ምን ፍረቅ አዋልድ ፈሪቅ ስኒት፡ ደምቤ-ሰምበል፡ አሰባሕ፡ አክርየ ገብአ እት ህለየ፡ ምን ፍረቅ ውላድ ህዩ ሰላም፡ ፈንቅል፡ ሕውነት ወዐወት ዐለው። ከሚሰ ወሰንበት ንኢሽ እተ ገብአ ትልህያታት ክልኢቱ ጀንሰ ህዩ፡ ምን ፍረቅ አዋልድ ለዲብ

አወላይ ደውረ እንዴ ኢልትቀለብ ለሐልፈየ ፈሪቅ ስኒት ምስለ እት ራብዓይት ደረጃት ለዐለ ፈሪቅ አክርየ ትዋጅህዩ። ፈሪቅ ስኒት ህዩ እብ ርሒቡ 3-0 እንዴ ቀልበየ እት ትልህየ ካቲመት ዲብ ለሐልፈ፡ ምን ውላድመ ቅልብ እንዴ ኢሳድፋ ዲብ ካልኢይ ደውረ ዕዱይ ለዐለ ፈሪቅ ሰላም ምስል ፈሪቅ ዐውት ተልህ። ፈሪቅ ሰላም ህዩ ክምለ ቀዳሚቱ 3-1 እንዴ ቀልቡ፡ እት ካቲመ ትልህያታት ተዐደ። ሰንበት ንኢሽ ህዩ አርበዕ ፈሪቅ ዲብ ካስ ለልሐልፎ ትልህያታቶም ዋድያም ዐለው። እሰልፍ ህዩ ፍረቅ አዋልድ ትዋጅህ። እት ዒድ ሕርየት ካስ ለነስኦ ፈሪቅ ደንቤ-ሰምበል ምስል አሰባሕ ተልህዩ።

እተ አወላይ ሾት ደንቤ-ሰምበል ቃልባት ምንመ ዐለየ፡ ሐር ላኪን እዲህን ለሰለመየ እተ ትልህየ ገብአት። አዋልድ ፈሪቅ አሰባሕ ህዩ እብ በቃዐት ውቅል እዲ ዛይደት ለአርኦየ ዲብ ትልህየ ትረኡት። አሰባሕ 2-0 እንዴ ቀልበየ፡ እት ትልህየ ካስ ምስል ፈሪቅ ስኒት እግል ልትዋጅሃ ቱ። ደርበን ትልህያሆም ለወደው ፍረቅ ውላድ ፈንቅል ምስል ሕውነት ዐለው። ለትልህየ ህዩ እብ ሰበብ ዝላም እብ ዘሃይፈ እንዴ ኢተምም አትካረመት። ሻምፕዮን ካልኢይ ዲቪዝዮን ፕሊቦል አቅሊም ምግብ፡ እት ፍንጌ ሰቦ ፈሪቅ ውላድ ወሰቦ ፈሪቅ አዋልድ ገብእ ለህለ ጀግራታት ከምክም።

ዱር ፈረንሳ 2023፡ ዲብ 16ይት መርሐለቱ

ምን ለአካባቢ ሰለሰ ሳምን እድወር ለህለ ጀግረ ዐጀላት ዱር ፈረንሳ፡ 15ይት መርሐለቱ እንዴ አትመመ፡ እት 16ይት መርሐለቱ አቲ ህለ። እለ ቅሩብ ተሚም ለህለ ጀግረ የም ዓመት እግል 110 ሰነት ገብእ ለህለ እት ገብእ፡ 3,405 ኪሎምትር እግል ልገልብብ ቱ። ዲብ ክል መርሐለትክ ዎርት መትባድራይ ሐዲስ ለአሽብርቅ ዲብ ህለ፡ መትባድራት ዐጀላት ዎርትክ ናየ ሚዘት ክም ቡ ለአርኦው እቱ ጀግራቱ። መሰለን እት ሰጋይድ፡ ፈጊር አድብር ወእት ጋድሞታት (መደረይ) ለመቅደረቶም ትትፈናቱ። እብ አሳሰለ አስክ እለ ኪልል ለህለ ንቀጥ ህዩ። እብ ንቀጥ ምን ፈሪቅ ጃምቦ-ቪዝዮ ላቱ ጆናስ ቪንጌጋርድ አወላይ መሬሕ ህለ፡ ደርቡ ህዩ ምን ፈሪቅ ዐጀላት እግራት ታዴጅ ፓጋካር፡ 3ይ ህዩ ካርሎስ ሮድሪጌዝ ምን ፈሪቅ ግሪናዴርቤ፡ ኣደም ያቴስ ምን ፈሪቅ እግራት ራብዓይ ወጃይ ሂንድሊይ ምን ፈሪቅ ቦራ-ሃንስባህ 5ይ።





መድሐራት፡

35^{ይት} ደውረት ክድመት ወጠን



ዲዛይን ታእዛዝ ኣብርሃ
ሰወር፡ ታእዛዝ ኣብርሃ
ሳልሕ ዓብይልቆድር
ኣብርሃም በየን